

MESYUARAT KETIGA, PENGKAL KETIGA
PARLIMEN KEEMPAT BELAS
2020

HARI ISNIN : 9 NOVEMBER 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 7 HINGGA NO. 51)

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK SERI PANGLIMA ABDUL AZEEZ
RAHIM (BALING)**

TARIKH : 9 NOVEMBER 2020 (ISNIN)

SOALAN

DATUK SERI PANGLIMA ABDUL AZEEZ BIN ABDUL RAHIM [BALING] minta **MENTERI DALAM NEGERI** menyatakan status siasatan terhadap insiden membawa pulang abu mayat Chin Peng pada akhir 2019 serta langkah-langkah Kerajaan bagi mengawal anasir komunis daripada mendapat simpati rakyat.

JAWAPAN

Tuan Yang Di Pertua,

Sehingga kini terdapat sebanyak 11 repot polis dibuat berkaitan isu abu mayat Chin Peng yang dibawa pulang ke Malaysia. Pihak polis telah melakukan siasatan di bawah seksyen 504 Kanun Keseksaan iaitu dengan sengaja mengaibkan dengan niat hendak membangkitkan pecah keamanan, seksyen 505(c) Kanun Keseksaan iaitu kenyataan-kenyataan yang mendatangkan khianat awam dan seksyen 233 Akta Komunikasi Dan Multimedia 1998 iaitu kesalahan penggunaan tidak wajar kemudahan rangkaian atau perkhidmatan rangkaian.

Kertas siasatan telah dirujuk ke Pejabat Peguam Negara pada 4 Jun 2020 dan keputusannya ialah NFA (*No Further Action*) kerana keterangan/elemen yang tidak mencukupi.

Tuan Yang Di Pertua,

Kementerian Dalam Negeri melalui penguatkuasaan oleh pihak Polis Diraja Malaysia (PDRM) tidak akan teragak-agak untuk mengambil tindakan tegas terhadap pihak yang cuba mencetuskan huru-hara atau menimbulkan sebarang bentuk provokasi sama ada melalui penulisan, ucapan atau penyebaran berita yang boleh mencetuskan keadaan yang tidak tenteram dalam masyarakat. Pihak PDRM akan melakukan tangkapan dan pendakwaan terhadap sebarang perlakuan tersebut berdasarkan peruntukan undang-undang sedia ada seperti Kanun Keseksaan, Akta Hasutan 1948 atau Akta Komunikasi Dan Multimedia bagi memastikan keharmonian rakyat terus terpelihara.

Walau bagaimanapun, sekiranya terdapat perkembangan terbaru berkaitan kes ini. Kerajaan akan melihat semula kes ini untuk tindakan selanjutnya dan rujuk kembali ke Jabatan Peguam Negara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 9 NOVEMBER 2020 (ISNIN)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI WILAYAH PERSEKUTUAN** menyatakan bilangan pembinaan rumah PPR, kos rendah, Rumawip, Residensi Wilayah dan mampu milik di Kuala Lumpur setiap tahun dari 2015-2020.

JAWAPAN

Tuan Yang Di Pertua,

Untuk makluman Yang Berhormat Setiawangsa, Jumlah unit rumah bagi Program Perumahan Rakyat (PPR) di Kuala Lumpur sejak diperkenalkan sehingga Ogos 2020 adalah sebanyak 38,395 unit. Bagi program Perumahan Awam (PA) di Kuala Lumpur pula, jumlah unit yang tersedia sejak diperkenalkan sehingga Ogos 2020 adalah sebanyak 23,614 unit. Manakala program perumahan mampu milik Residensi Wilayah (dulu dikenali sebagai RUMAWIP), telah menyediakan sejumlah 54,479 unit rumah di Kuala Lumpur semenjak tahun 2014.

Pihak Kementerian Wilayah Persekutuan juga akan melaksanakan program perumahan mampu milik baharu iaitu Residensi Prihatin bagi membantu golongan berpendapatan rendah B40 untuk memiliki sendiri di Wilayah Persekutuan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. NIK MUHAMMAD ZAWAWI BIN HAJI
SALLEH [PASIR PUTEH]**

TARIKH : 9 NOVEMBER 2020 (ISNIN)

SOALAN

DR. NIK MUHAMMAD ZAWAWI BIN HAJI SALLEH [PASIR PUTEH] minta **MENTERI SUMBER MANUSIA** menyatakan adakah pihak Kementerian bersedia mempertimbangkan kebenaran kepada pihak majikan untuk menggunakan terma kontrak pekerjaan yang disertakan dengan "*recall clause*" supaya majikan asal dapat mendapatkan semula tenaga kerja mereka apabila perniagaan semakin pulih.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, Garis Panduan Pengurusan Pemberhentian Pekerja yang dikeluarkan oleh Jabatan Tenaga Kerja Semenanjung Malaysia, ada menyatakan bahawa majikan perlu mengambil semula pekerja yang telah diberhentikan apabila wujud kekosongan jawatan dalam syarikat tersebut.
2. Selain itu, perenggan 23 Tatacara Untuk Keharmonian Perusahaan, dengan izin *Code of Conduct for Industrial Harmony* turut menyatakan bahawa pekerja-pekerja yang telah diberhentikan hendaklah diberi keutamaan seberapa yang boleh, untuk diambil bekerja semula oleh majikan tersebut.
3. Justeru, dalam situasi mencabar pada masa sekarang, pihak Kerajaan amat menggalakkan majikan mengambil semula pekerja mereka yang telah diberhentikan. Walau bagaimanapun, pemakaian terma "*recall clause*" sebagai salah satu terma dalam kontrak perkhidmatan dan perjanjian bersama adalah tertakluk kepada persetujuan di antara majikan, pekerja dan kesatuan sekerja.
4. Kerajaan tiada halangan jika majikan-majikan di Malaysia dapat mengambil langkah proaktif dengan menggaji semula pekerja yang telah diberhentikan setelah perniagaan mereka semakin pulih.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 09 NOVEMBER 2020 (ISNIN)

SOALAN

Minta **MENTERI PENGANGKUTAN** menyatakan jumlah kutipan hasil yang diperoleh Jabatan Pengangkutan Jalan Wilayah Persekutuan setiap hari (secara purata), setiap bulan sepanjang tahun 2019 dan 2020, jumlah peruntukan menaik taraf infrastruktur pejabat bagi kegunaan awam dan pegawai Jabatan serta rancangan menambah pejabat cawangan di Kuala Lumpur.

JAWAPAN

Yang di-Pertua,

1. Untuk makluman Yang Berhormat, purata kutipan hasil harian yang diperolehi Jabatan Pengangkutan Jalan Wilayah Persekutuan (JPJ WPKL) untuk tahun 2019 adalah RM1,573,883.48 dan untuk tahun 2020 adalah RM1,197,755.70 (sehingga Oktober 2020).
2. Selain itu, jumlah peruntukkan yang diterima bagi memperbaiki dan menaik taraf infrastruktur pejabat bagi kegunaan awam dan pegawai JPJ WPKL adalah sejumlah RM344,900.00 bagi tahun 2019 dan RM366,659.50 bagi tahun 2020. Peruntukkan ini adalah bagi menampung kerja-kerja pembaikan dan penyelenggaraan skop kerja sivil, mekanikal dan elektrik melibatkan semua pejabat/cawangan di bawah JPJ WPKL.
3. Untuk tujuan menaik taraf pejabat/cawangan JPJ WPKL, pihak Jabatan telah mendapatkan pandangan dan penilaian oleh agensi teknikal melalui Jabatan Kerja Raya Malaysia. Anggaran kos keseluruhan bagi menaik taraf pejabat/cawangan terlibat adalah sebanyak RM3,305,205.00.
4. Pihak Kementerian Pengangkutan mengambil maklum akan peningkatan bilangan orang awam yang mengunjungi pejabat/cawangan Jabatan Pengangkutan Jalan. Bagi menambah baik aspek penyampaian perkhidmatan, Kementerian dan JPJ dan sentiasa melaksanakan langkah-langkah penambahbaikan termasuklah memperluaskan urusan niaga atau perkhidmatan secara atas talian. Inisiatif sebegini akan membolehkan orang ramai melengkapkan urusan niaga terlibat mengikut keselesaan dan masa sendiri seterusnya mengurangkan kesesakan di pejabat-pejabat JPJ untuk jangka masa panjang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 9 NOVEMBER 2020 (ISNIN)

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI ALAM SEKITAR DAN AIR** menyatakan bagaimanakah penyelesaian pematuhan Akta Kualiti Alam Sekitar 1974 berkaitan pembukaan dan penanaman durian Musang King di Raub Pahang.

JAWAPAN

Tuan Yang Di-Pertua,

1. Soalan ini berkenaan dengan pematuhan Akta Kualiti Alam Sekeliling 1974 (Akta 127) yang ada kaitan dengan pembukaan dan penanaman Durian Musang King di Raub, Pahang.
2. Untuk makluman Ahli-Ahli Yang Berhormat, **isu pencerobohan hutan di Raub ini adalah dibawah bidang kuasa Kerajaan Negeri Pahang.**
3. Berdasarkan Perintah Kualiti Alam Sekeliling (Aktiviti Yang Ditetapkan) (Penilaian Kesan Kepada Alam Sekeliling) 2015, Akta 127, aktiviti pembukaan dan penanaman Durian Musang King di Raub, Pahang dan mana-mana kawasan lain seumpamanya, memerlukan kelulusan Laporan Penilaian Kesan Kepada Alam Sekeliling (**Laporan EIA**), bagi sebarang aktiviti seperti berikut ;

NO. SOALAN : 11

- i. Skim Kemajuan Tanah yang meliputi kawasan **seluas 20 hektar atau lebih**, untuk menukar kawasan Hutan kepada aktiviti Pertanian.
 - ii. **Pengubahan Hutan pada ketinggian 300 meter atau lebih** di atas purata aras laut kepada mana-mana kegunaan tanah yang meliputi kawasan **seluas 20 hektar atau lebih**.
 - iii. Pembangunan **atau pembersihan tanah yang meliputi kawasan berkecerunan 25° (darjah) hingga 35° (darjah)**. Jika kecerunan melebihi 35° (darjah) sebarang aktiviti pembangunan adalah tidak dibenarkan.
4. Sekiranya pemaju tidak mematuhi **Laporan EIA dan syarat kelulusan EIA termasuk *Environmental Management Plan*, EMP** (dengan izin), ianya dikira melanggar Akta 127. Jika didapati bersalah, **boleh di denda tidak melebihi RM500,000 atau tidak melebihi 5 tahun penjara atau kedua-duanya sekali**. Pesalah juga akan di denda **RM1000 setiap hari atas kesalahan yang diteruskan** selepas notis diberikan.
5. Pembangunan haram kawasan hutan atau tidak mematuhi Laporan EIA dan EMP akan **menyebabkan hakisan tanah, sungai menjadi cetek dan berkeladak**. Ini berpotensi **menyebabkan Loji Rawatan Air ditutup** yang menyebabkan rakyat terputus bekalan air dan **banjir** boleh berlaku semasa musim tengkujuh.
6. Selain daripada itu, **penggunaan baja dan racun serangga** perosak juga berisiko mengalir ke alur air berdekatan yang boleh menyebabkan **sumber air tercemar** yang **boleh menjejaskan bekalan air serta risiko kepada kesihatan manusia dan mengancam biodiversiti**.
7. Oleh itu, KASA menyeru sebarang pembangunan hutan dan dalam konteks ini untuk penanaman durian perlu **mengikut undang-undang sedia ada dan pendekatan *ecosystem based approach*** (dengan izin) supaya kelestarian alam dan kesejahteraan rakyat terjaga.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM KIT SIANG [ISKANDAR PUTERI]

TARIKH : 9 NOVEMBER 2020 (ISNIN)

SOALAN

YB TUAN LIM KIT SIANG [ISKANDAR PUTERI] minta **MENTERI KANAN PERDAGANGAN ANTARABANGSA DAN INDUSTRI** menyatakan sama ada terdapat sebarang bentuk kerjasama strategik antara PROTON dan PERODUA, dan sama ada kajian kebolehlaksanaan mengenainya telah dijalankan, serta langkah-langkah yang diambil untuk mengelakkan persaingan negatif antara kedua syarikat ini.

JAWAPAN

Tuan Yang di-Pertua,

1. Setakat ini, pihak PROTON mahupun PERODUA masih tidak memaklumkan sebarang bentuk kerjasama strategik di antara keduanya.
2. Ekosistem perniagaan PROTON dan PERODUA saling berkait rapat terutamanya daripada segi perkongsian 76 pembekal/vendor tempatan yang sama yang melibatkan lebih daripada 50,000 pekerja.
3. MITI menerusi Institut Automotif, Robotik dan IoT Malaysia (MARii) telah mengadakan beberapa bidang kerjasama dengan kedua-dua syarikat

ini di bawah Dasar Automotif Nasional (NAP) 2020 bagi meningkatkan keupayaan ekosistem automotif tempatan.

4. Antara kerjasama tersebut ialah:

- a. Program pembangunan vendor termasuk program **Quality, Cost and Delivery (QCD)**, dan **Market Exploration**. QCD ialah program yang bertujuan untuk membantu syarikat meningkatkan kualiti produk, mengurangkan kos pada tahap yang lebih kompetitif dan menguruskan penghantaran *Just-in-time* (JIT). Program *Market Exploration* pula adalah untuk memberi peluang kepada vendor tempatan untuk menerokai teknologi dan produk inovatif yang dihasilkan oleh syarikat antarabangsa, membina hubungan dengan syarikat-syarikat antarabangsa dan seterusnya membolehkan vendor tempatan terlibat di dalam rangkaian bekalan global;
- b. Kerjasama dari segi penggunaan aplikasi teknologi Industri 4.0 di **MARii Simulation & Analysis Center (MARSAC)** dan **National Digitalisation Center (NDC)**:
 - i. Kemudahan di MARSAC bertujuan untuk membantu meningkatkan kemahiran tenaga kerja dalam aspek rekabentuk teknologi termaju dan impak tinggi, mengoptimumkan kos serta meningkatkan pembangunan modal insan di kalangan pengeluar komponen automotif dan mobiliti tempatan. Di MARSAC, jurutera-jurutera dari kedua-dua syarikat boleh menjalankan simulasi digital berteknologi tinggi semasa fasa validasi dalam proses pembuatan komponen automotif dan mobiliti.
 - ii. *National Digitalisation Center* (NDC) menyediakan kemudahan visualisasi reka bentuk (AR/VR). Teknologi AR/VR ini membantu syarikat untuk melakukan pemeriksaan reka bentuk dengan mengambil kira aspek perubahan semasa (*real-time*) pada peringkat awal

berbanding dengan menggunakan kaedah konvensional *clay modelling* sebagai prototaip;

- c. Kerjasama dalam bidang pengujian di ***National Emission Test Center (NETC)*** yang merupakan fasiliti pengujian yang menjalankan ujian pelepasan gas dari kenderaan berdasarkan *United Nations Regulation* (UNR) No. 83 dan No. 101.
 - d. Aktiviti penyelidikan dan pembangunan (R&D) bagi membangunkan *Malaysia Driving Cycle* untuk mengkaji kitaran pemanduan (*Driving Cycle*) kenderaan berdasarkan infrastruktur jalan yang terdapat di Malaysia. Tujuan utama aktiviti R&D ini dijalankan adalah untuk memastikan tahap pelepasan karbon dari ekzos kenderaan dan penggunaan bahan bakar adalah merujuk kepada nilai sebenar yang dilepaskan oleh kenderaan di Malaysia.
5. Penglibatan oleh PROTON dan PERODUA di dalam inisiatif Kerajaan bagi pembangunan keupayaan ekosistem automotif ini membolehkan pemindahan kemahiran dan teknologi dapat dijalankan secara strategik di antara kedua-dua syarikat di samping menjamin persaingan yang sihat.
6. Secara kesimpulannya, Kerajaan sentiasa membantu kedua-dua syarikat melalui kemudahan-kemudahan dan tawaran program yang bersesuaian bagi mengukuhkan ekosistem untuk mendukung kedua-dua syarikat meningkatkan keupayaan. Walau bagaimanapun, keputusan sebenar untuk membentuk sesuatu kerjasama strategik adalah keputusan perniagaan oleh kedua-dua syarikat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI TAJUDDIN BIN ABDUL
RAHMAN [PASIR SALAK]**

TARIKH : 9 NOVEMBER 2020 (ISNIN)

SOALAN

DATO' SRI HAJI TAJUDDIN BIN ABDUL RAHMAN [PASIR SALAK] minta **MENTERI KESIHATAN** menyatakan apakah langkah-langkah untuk membaik pulih hospital yang uzur di seluruh Malaysia.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa berusaha menambahbaik capaian sistem perkhidmatan kesihatan demi kesejahteraan rakyat Malaysia. Dalam hal ini, KKM mengambil pendekatan **3R (Repair, Replace, Restore) dalam Rancangan Malaysia Ke-12** secara berterusan untuk menaik taraf peralatan perubatan dan fasiliti kesihatan yang usang dan uzur. Langkah ini merupakan inisiatif Kementerian Kesihatan sebagai usaha untuk meningkatkan aspek keselamatan pesakit, kakitangan dan fasiliti kesihatan sedia ada.

2. Sepanjang Rancangan Malaysia ke-11, **sehingga bulan Oktober tahun 2020, sebanyak 17 buah hospital telah siap dibaik pulih dan dinaik taraf.** Antara hospital yang terlibat ialah Pembinaan Blok Wanita dan Kanak-Kanak serta Jabatan Kardiologi Hospital Ipoh, Perak, Pembinaan Kompleks Obstetrik Hospital Tengku Ampuan Rahimah, Klang, Selangor dan Pembinaan Blok Psikiatrik Hospital Sultanah Nur Zahirah, Kuala Terengganu, Terengganu.

3. Manakala sebanyak 32 buah hospital lagi kini sedang dibaik pulih dan dinaik taraf. Antara hospital yang terlibat ialah Pembinaan *Multi Storey Block*, Hospital Seberang Jaya, Pulau Pinang, Pembinaan Kompleks Endokrin Hospital Putrajaya, W.P. Putrajaya dan Naiktaraf Hospital Tawau, Sabah.

4. Di samping itu juga, Kementerian ini sedang merangka **Inisiatif Baik Pulih dan Naik Taraf Hospital Lama KKM**, khususnya dalam aspek keselamatan dan pencegahan kebakaran. Inisiatif ini melibatkan 47 buah hospital lama, dan akan dijalankan secara berfasa. Fasa 1 melibatkan Kerja-Kerja Awalan bagi 21 buah Hospital Lama, manakala Fasa 2 pula akan melibatkan 26 buah Hospital Lama selainnya. Fasa 1 dijadualkan akan dimulakan di bawah Rancangan Malaysia ke-12 pada tahun hadapan.

Sekian terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN AKMAL NASRULLAH B. MOHD NASIR
(JOHOR BAHRU)**

TARIKH : 9 NOVEMBER 2020

SOALAN

TUAN AKMAL NASRULLAH BIN MOHD. NASIR [JOHOR BAHRU] minta **MENTERI DALAM NEGERI** menyatakan usaha yang telah dijalankan bagi mencegah penularan COVID-19 di Depoh Tahanan Imigresen (DTI) seperti yang berlaku di DTI Bukit Jalil dan DTI Semenyih serta di penjara seperti Penjara Alor Setar di Kedah.

JAWAPAN

Tuan Yang Di Pertua,

Mohon izin supaya soalan daripada YB Johor Bahru ini dijawab bersekali dengan soalan bernombor 12834 daripada YB Seputeh memandangkan kedua-dua soalan yang diutarakan menyentuh isu yang sama iaitu tindakan mencegah penularan wabak COVID-19 di Depot Tahanan Imigresen dalam kalangan tahanan.

Untuk makluman Ahli Yang Berhormat, Kementerian Dalam Negeri (KDN) sentiasa memandang serius berkenaan isu Pendatang Asing Tanpa Izin (PATI) di negara ini terutamanya semasa krisis dan penularan pandemik COVID-19 di seluruh dunia pada ketika ini. Sepertimana Ahli Yang Berhormat sedia maklum, Op Benteng dilaksanakan sepanjang tempoh Perintah Kawalan Pergerakan (PKP) dikuatkuasakan secara bersepadu melalui kerjasama pelbagai Agensi / Jabatan seperti Polis Diraja Malaysia

SOALAN NO : 14

(PDRM) melalui Pasukan Gerakan Am (PGA) dan Angkatan Tentera Malaysia (ATM) yang mana ditugaskan untuk menyekat kemasukan PATI dan aktiviti penyeludupan. Bermula dari 1 Mei 2020 sehingga 2 November 2020, Op Benteng telah merekodkan tangkapan berjumlah 7,928 orang PATI dari pelbagai warganegara.

KDN melalui Jabatan Imigresen Malaysia (JIM) turut sentiasa memastikan tahap kesihatan yang baik di kalangan tahanan di Depot Tahanan Imigresen. Dengan peningkatan jumlah tahanan sepanjang tempoh Perintah Kawalan Pergerakan (PKP), pihak JIM mengambil langkah-langkah mengekang penularan wabak COVID-19 di kalangan tahanan dengan mewujudkan *Standard Operating Procedure* (SOP) termasuk mewajibkan saringan COVID-19 ke atas semua tahanan baharu yang memasuki Depot Tahanan Imigresen.

Selain itu, saringan gejala seperti demam, batuk dan selsema akan dilaksanakan secara berkala terhadap semua tahanan oleh Penolong Pegawai Perubatan yang bertugas di Depot Tahanan Imigresen. Tahanan yang mempunyai gejala akan diasingkan dan segera dibawa ke hospital atau klinik terdekat bagi mendapatkan rawatan. Pihak JIM turut mendapatkan kerjasama daripada Jabatan Penjara Malaysia untuk menggunakan fasiliti penjara dan fasiliti lain bagi tujuan penempatan tahanan imigresen untuk mengelakkan kesesakan yang terlalu tinggi di Depot Tahanan Imigresen sedia ada.

Bagi memastikan tahap kesihatan para tahanan sentiasa dalam keadaan baik, pihak JIM bekerjasama dengan Kementerian Kesihatan Malaysia (KKM) untuk menempatkan 14 orang Penolong Pegawai Perubatan di Depot Tahanan Imigresen di seluruh negara bagi memberikan rawatan awal kepada tahanan. Klinik kesihatan yang berhampiran telah dikenalpasti dan dipilih oleh KKM bagi memperkukuh perkhidmatan kesihatan di Depot Tahanan Imigresen serta berperanan sebagai pusat rujukan oleh Penolong Pegawai Perubatan yang dilantik dan sebagai pembekal keperluan perubatan ke depot-depot. Pemantauan kesihatan secara berkala turut dilakukan oleh KKM ke Depot Tahanan Imigresen dari semasa ke semasa.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE EMPAT BELAS**

PERTANYAAN : LISAN

DARIPADA : YB TUAN AHMAD JOHNNIE BIN ZAWAWI [IGAN]

TARIKH : 9 NOVEMBER 2020 (ISNIN)

SOALAN

Minta **MENTERI PERTANIAN DAN INDUSTRI MAKANAN** menyatakan apakah perancangan jangka panjang Kementerian untuk menaikkan taraf ekonomi dan pendapatan petani dan nelayan di kawasan Parlimen Igan.

JAWAPAN

Yang di-Pertua,

1. Untuk makluman Yang Berhormat, Kementerian Pertanian dan Industri Makanan melalui Jabatan Pertanian Sarawak telah melaksanakan pelbagai program pembangunan pertanian di kawasan Parlimen Igan. Bagi tempoh 2016 hingga 2020, Kerajaan telah memperuntukkan sebanyak RM1.648 juta untuk tujuan pembangunan pertanian di kawasan tersebut. Ia melibatkan pembangunan kawasan seluas 156.2 hektar dengan penglibatan 180 orang petani. Skim bantuan di bawah program pertanian yang dilaksanakan oleh Jabatan Pertanian Sarawak di Parlimen Igan berjaya meningkatkan pendapatan kasar golongan sasar sehingga maksimum RM3,000 sebulan.

2. Selain daripada itu, Kementerian melalui Lembaga Perindustrian Nanas Malaysia (LPNM) juga telah melaksanakan program pembangunan pertanian di kawasan Parlimen Igan dengan keluasan penanaman nanas adalah 98 hektar yang melibatkan jumlah pengusaha seramai 56 orang.

3. Kementerian juga melalui Lembaga Kemajuan Ikan Malaysia (LKIM) sentiasa memastikan taraf hidup dan ekonomi masyarakat nelayan terbela. Bagi tahun 2020, seramai 496 nelayan di kawasan Igan telah menerima bantuan dengan nilai keseluruhan berjumlah RM857 ribu melalui bantuan seperti berikut:

- i. **Elaun Sara Hidup Nelayan** iaitu bayaran tunai sebanyak RM250 sebulan. Bermula Januari 2021, kadar ESH akan dinaikkan kepada RM300/bulan;
- ii. **Insentif Tangkapan Ikan** pada kadar 10sen per kilogram. Maksimum bayaran tunai yang diterima oleh pemilik vesel zon A adalah sebanyak RM150 sebulan;

- iii. **Bantuan Tanaman Kontan** – Bantuan peralatan dan input pertanian seperti peralatan, benih dan baja bernilai sehingga RM1,000 seorang, dan
- iv. **Program Pembangunan Usahawan Bimbingan (PUB).** Sehingga kini terdapat 14 usahawan dari kawasan Igan yang telah mendaftar di bawah program ini. Usahawan yang layak boleh memohon geran pepadanan seperti berikut:

Geran Pepadanan	Kadar Pembiayaan Kerajaan: Usahawan	Had maksimum pembiayaan
Change Upgrade Product (CUP)	70 % : 30%	RM60,000
High Impact Project (HIP)	50% : 50%	RM200,000
Geran Agropreneur Muda (GAM) Khas untuk usahawan berumur 18 hingga 40 tahun.	100%	RM20,000

- v. Pembinaan Jeti Kampung Igan (2010) dan Jeti Kampung Skerang (2011) yang bernilai RM566 ribu sebagai kemudahan pendaratan ikan kepada nelayan;
4. Perancangan jangka panjang Kementerian untuk menaikkan taraf ekonomi dan pendapatan petani serta nelayan yang telah dirancang adalah seperti berikut:
- i. Memberi keutamaan kepada pembangunan tanaman makanan yang berorientasikan eksport. Jenis tanaman yang dikenal pasti ialah durian, kelapa, pisang dan nanas bernilai tinggi jenis MD2;

- ii. Memperkenalkan dan mempromosikan penggunaan teknologi moden seperti fertigasi, hidroponik dan mengaplikasikan *internet of Things* (IoT) bagi petani untuk meningkatkan hasil dan kualiti pengeluaran pertanian;
- iii. Membangunkan Pusat Pengumpulan, Pemprosesan dan Pembungkusan (CPPC) untuk hasil pertanian;
- iv. Pembinaan baru Pejabat PNK di Matu/Daro dengan kos sebanyak RM800 ribu bagi meningkatkan urus tadbir institusi nelayan.
- v. Memperkasa program pemasaran ikan dengan membeli ikan terus daripada nelayan dengan harga yang lebih berpatutan atau pun setanding berbanding peraih lain melalui Pusat Pengumpulan dan Penedaran (CCDC) di PNK Matu/Daro; dan
- vi. memperluaskan caruman Skim Keselamatan Sosial Pekerjaan Sendiri (SKSPS) menerusi PERKESO bertujuan untuk melebarkan lagi jaringan keselamatan sosial (*social safety net*).

5. Kementerian akan meneruskan usaha merangka projek/program untuk dimanfaatkan bagi memastikan taraf ekonomi kumpulan sasar di bawah Kementerian dapat ditingkatkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN SANISVARA NETHAJI RAYER A/L
RAJAJI [JELUTONG]**

TARIKH : 9 NOVEMBER 2020 (ISNIN)

SOALAN

Minta **MENTERI PENGANGKUTAN** menyatakan mengapa Kerajaan membazirkan duit dengan rancangan projek lapangan terbang baru di Kulim, Kedah. Bukankah wajar untuk Kerajaan Persekutuan menjimatkan perbelanjaan ini dan menggunakan dana untuk projek naik taraf Lapangan Terbang Antarabangsa Pulau Pinang.

JAWAPAN

Yang Dipertua,

1. Untuk makluman Yang Berhormat, cadangan Kerajaan Negeri Kedah untuk membangunkan Projek Pembangunan Lapangan Terbang Antarabangsa Kulim (KXP) dan Kedah Aerotropolis adalah dengan dibiayai melalui Inisiatif Pembiayaan Swasta (PFI) dan tidak melibatkan sebarang peruntukan Kerajaan Pusat. Sehubungan itu, tidak timbul sebarang isu berhubung pembaziran atau penjimatan peruntukan Kerajaan.
2. Manakala cadangan projek naik taraf Lapangan Terbang Antarabangsa Pulau Pinang pula akan dibiayai sendiri oleh Malaysia Airports Holdings Berhad (MAHB). Walau bagaimanapun, disebabkan penularan wabak COVID-19 yang telah memberi kesan negatif terhadap industri penerbangan negara, ianya juga telah menjejaskan kemampuan MAHB untuk membiayai projek tersebut buat sementara ini.
3. Syarikat penerbangan dijangka memerlukan tempoh masa 3 tahun untuk pulih sepenuhnya dari impak wabak COVID-19, tertakluk kepada situasi semasa penularan wabak tersebut di dalam dan luar negara. Dalam hal ini, bagi memastikan keperluan pembangunan jangka panjang lapangan terbang/padang terbang di Malaysia berdasarkan keperluan industri semasa mengambil kira impak COVID-19 dan keperluan sistem jaringan kesalinghubungan pengangkutan negara, Kementerian Pengangkutan akan melaksanakan kajian *National Airports Strategic Plan* (NASP) yang akan bermula pada tahun 2021.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN JUGAH ANAK MUYANG @ TAMBAT
[LUBOK ANTU]**

TARIKH : 9 NOVEMBER 2020 (ISNIN)

SOALAN

TUAN JUGAH ANAK MUYANG @ TAMBAT [LUBOK ANTU] minta **MENTERI KESIHATAN** menyatakan sekiranya pihak Kementerian bercadang menempatkan pegawai fisioterapi (Klinik Rehab) di Parlimen P.203 Lubok Antu, Sarawak.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa memastikan penyampaian perkhidmatan kesihatan yang berkesan kepada rakyat termasuk di kawasan Parlimen Lubok Antu, Sarawak. Bagi daerah Lubok Antu terdapat lapan (8) klinik kesihatan yang terdiri daripada Klinik Kesihatan Jenis 6 dan 7 iaitu Klinik Kesihatan Batang Ai, Klinik Kesihatan Engkilili, Klinik Kesihatan Lubok Antu, Klinik Kesihatan Merindun, Klinik Kesihatan Nanga Delok, Klinik Kesihatan Nanga Kesit, Klinik Kesihatan Nanga Patoh dan Klinik Kesihatan Nanga Stamang.

2. Buat masa ini, **perkhidmatan fisioterapi di kawasan berkenaan dilaksanakan oleh Jurupulih Perubatan Fisioterapi U29 dari Klinik Kesihatan Sri Aman** yang mengadakan lawatan berkala secara berjadual iaitu seminggu sekali ke empat (4) buah klinik kesihatan iaitu Klinik Kesihatan Lubok Antu, Klinik Kesihatan Engkili, Klinik Kesihatan Tanjung Bijat dan Klinik Kesihatan Pantu dan juga ke tiga pusat pemulihan dalam komuniti di Batang Ai, Sri Aman dan Lingga.

3. KKM akan meneliti keperluan perkhidmatan kesihatan dengan mengambil kira keperluan di kawasan bandar dan luar bandar melalui proses menaik taraf kemudahan dan perkhidmatan yang disediakan di fasiliti kesihatan. KKM juga akan menjalankan kajian rasionalisasi dan meneliti penempatan semula pegawai khususnya Jurupulih Perubatan Fisioterapi berdasarkan keperluan perkhidmatan yang perlu disediakan dan ruang di fasiliti kesihatan yang berkenaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 9 NOVEMBER 2020 (ISNIN)

SOALAN

TUAN FONG KUI LUN [BUKIT BINTANG] minta **MENTERI WILAYAH PERSEKUTUAN** menyatakan kedudukan projek tebatan banjir '*river of life*' dan mengapa Kuala Lumpur masih mudah dilanda banjir kilat walaupun pelbagai usaha penebatan banjir telah dilaksanakan.

JAWAPAN

Tuan Yang Di Pertua,

Untuk makluman Yang Berhormat Bukit Bintang, Projek *River of Life* (RoL) bukanlah bertujuan sebagai Projek Tebatan Banjir. Sebaliknya, projek ini merupakan pelengkap kepada pembangunan Kuala Lumpur di mana sasaran utama Projek RoL adalah menjadikan 10.7km jajaran Sungai Klang dan Sungai Gombak sebagai ikon *waterfront* yang dinamik dengan nilai ekonomi tinggi serta meningkatkan kualiti air sungai sedia ada.

Namun, Dewan Bandaraya Kuala Lumpur memandang serius isu banjir di Kuala Lumpur di mana senantiasanya berkerjasama dengan Jabatan Pengairan dan Saliran (JPS) di bawah Kementerian Alam Sekitar dan Air (KASA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI AHMAD
BIN HAJI MASLAN [PONTIAN]**

TARIKH : 9 NOVEMBER (ISNIN)

SOALAN

DATUK SERI HAJI AHMAD BIN HAJI MASLAN [PONTIAN] minta **MENTERI PERDAGANGAN ANTARABANGSA DAN INDUSTRI** menyatakan usaha serta insentif bagi membuka kawasan industri baru di luar bandar dan berikan bukti serta contoh kejayaan serta jumlah peluang pekerjaan kepada rakyat tempatan.

JAWAPAN

Tuan Yang di-Pertua,

1. Usaha meningkatkan projek pelaburan yang seimbang dan inklusif di kawasan-kawasan luar bandar dan kurang membangun merupakan salah satu agenda utama Kerajaan dalam memastikan pembangunan ekonomi yang seimbang di seluruh negara dan menjana lebih banyak peluang pekerjaan dan perniagaan.

2. Sehubungan itu, MITI melalui Lembaga Pembangunan Pelaburan Malaysia (MIDA) telah menawarkan Insentif Kawasan Kurang Membangun (*Less Developed Area Incentive – LDA Incentive*) dalam menarik pelaburan seperti berikut:

- a) Pengecualian Cukai Pendapatan sebanyak 100% selama 15 tahun (5+5+5) bermula dari tahun syarikat menghasilkan pendapatan berkanun,
atau
Pengecualian Cukai Pendapatan bersamaan Elaun Cukai Pelaburan sebanyak 100% daripada perbelanjaan modal yang layak yang dilakukan bagi tempoh 10 tahun (5+5). Elaun ini dibenarkan ditolak sehingga 100% daripada pendapatan berkanun bagi setiap tahun taksiran;
- b) Pengecualian duti setem ke atas surat cara perjanjian pemindahan atau pajakan tanah atau bangunan yang digunakan untuk pembangunan;
- c) Pengecualian cukai pegangan ke atas royalti dan yuran teknikal ke atas bayaran kepada bukan pemastautin tidak lewat daripada 31 Disember 2020; dan
- d) Pengecualian duti import dan cukai jualan ke atas bahan mentah, komponen, mesin, peralatan, alat ganti dan gunahabis yang tidak dikeluarkan dalam negara dan digunakan secara langsung dalam pengeluaran, tertakluk kepada polisi semasa di MIDA.

3. Sehingga September 2020, sebanyak 20 projek telah diluluskan di bawah insentif LDA dengan jumlah pelaburan keseluruhan sebanyak RM6.0 bilion. Projek-projek ini dijangka akan menyediakan sebanyak 3,289 peluang pekerjaan kepada penduduk tempatan dan seterusnya dapat membantu meningkatkan rantaian ekonomi tempatan. Di samping itu, ianya juga turut menggalakkan pembangunan infrastruktur dan logistik, selain meningkatkan usaha sama syarikat tempatan dengan syarikat asing bagi pembangunan industri dan pemindahan teknologi serta menggalakkan aktiviti hiliran untuk menghasilkan produk bernilai tambah tinggi.

Tuan Yang Di-Pertua,

4. Selain itu juga, MITI melalui MIDA bekerjasama erat dengan pihak kerajaan negeri dan agensi-agensi berkaitan bagi melipat gandakan usaha-usaha promosi pelaburan, termasuk dengan pihak berkuasa koridor seperti Wilayah Ekonomi Pantai Timur (negeri Kelantan, Terengganu dan Pahang) dan Wilayah Ekonomi Koridor Utara (negeri Perak, Kedah dan Perlis).

5. Kerjasama erat ini berjaya membawa masuk pelaburan ke kawasan luar bandar. Bagi tempoh Januari hingga September 2020, sebanyak RM70.5 bilion pelaburan telah diluluskan dalam sektor perkilangan menerusi 740 projek. Projek-projek ini dijangka akan menjana sebanyak 51,172 peluang pekerjaan. Daripada jumlah keseluruhan ini, di antara negeri-negeri yang merekodkan jumlah pelaburan tertinggi dan peluang pekerjaan yang diluluskan adalah Sarawak dengan pelaburan sebanyak RM15.8 bilion dan 6,006 peluang pekerjaan. Ini diikuti oleh Sabah RM11.9 bilion (579 peluang pekerjaan), Pulau Pinang RM10.6 bilion (9,137 peluang pekerjaan), Pahang RM8.3 bilion (1,416 peluang pekerjaan), Selangor RM7.3 bilion (12,195 peluang pekerjaan) dan Johor RM5.7 bilion (10,107 peluang pekerjaan).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 9 NOVEMBER 2020 (ISNIN)

SOALAN

TUAN WONG CHEN [SUBANG] minta **MENTERI ALAM SEKITAR DAN AIR** menyatakan:

- (a) adakah pihak Kementerian mempunyai rancangan untuk memberikan pinjaman kewangan kepada Air Selangor untuk membantu meningkatkan kapasiti bekalan air; dan
- (b) jumlah dan garis masa untuk sokongan kewangan tersebut, jika ada.

JAWAPAN

Tuan Yang Di-Pertua,

1. Memandangkan Kerajaan Negeri Selangor telah memuktamadkan penstrukturan semula industri bekalan air pada 2019, maka bantuan kewangan yang disediakan kepada Air Selangor dalam dua (2) bentuk:

- (i) Pinjaman melalui Pengurusan Aset Air Berhad (PAAB) bagi pembangunan aset-aset air seperti loji rawatan air, penukaran dan penggantian paip, pembinaan tangki simpanan dan sebagainya. Pelaksanaan projek-projek ini penting bagi menjamin kelangsungan bekalan air dari segi peningkatan rizab margin,

pengurangan NRW dan kedudukan kewangan lebih kukuh kepada Air Selangor; dan

- (ii) Peruntukan secara geran bagi pembangunan projek sumber air seperti empangan, takungan air pinggiran sungai (TAPS), baraj dan sebagainya yang penting bagi memastikan kelangsungan sumber air dalam jangka panjang.

2. Penyaluran pinjaman oleh PAAB kepada Air Selangor akan dibuat berdasarkan kepada perancangan dalam Pelan Perniagaan yang diluluskan oleh Suruhanjaya Perkhidmatan Air Negara (SPAN). Aset-aset ini kelak akan dipajakan kepada Air Selangor untuk operasi dan penyelenggaraan.

3. Manakala peruntukan secara geran akan disediakan berdasarkan perancangan Air Selangor yang dikemukakan kepada KASA bagi setiap *Rolling Plan* Rancangan Lima Tahun Kerajaan Persekutuan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 9 NOVEMBER 2020 (ISNIN)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI KESIHATAN** menyatakan langkah-langkah proaktif dan berkesan yang diambil Kementerian bagi melandaikan lengkung kes COVID-19 pada masa ini setelah jumlah kes positif COVID-19 kembali meningkat selepas tarikh 26 September 2020.

JAWAPAN

Tuan Yang di-Pertua,

1. Sebagaimana semua sedia maklum, **gelombang ketiga COVID-19 di Malaysia bermula pada 20 September 2020 memandangkan terdapat peningkatan pelaporan kes COVID-19 di beberapa negeri.** Negeri-negeri yang melaporkan kes COVID-19 yang tertinggi adalah negeri Kedah dan Sabah. Lonjakkan kes COVID-19 semasa fasa Perintah Kawalan Pergerakan Pemulihan (PKPP) ini mendorong Kerajaan untuk mengambil langkah-langkah proaktif dan berkesan untuk membendung penularan jangkitan COVID-19 di Malaysia.
2. Justeru, bagi memastikan koordinasi bagi aktiviti pengesanan kes dan kawalan pencegahan COVID-19 dapat dijalankan secara sistematik dan berkesan di setiap negeri, **Kerajaan telah melaksanakan Perintah Kawalan Pergerakan Diperketatkan Bersasar (PKPDB) di beberapa daerah di Sabah diikuti dengan Perintah Kawalan Pergerakan Bersyarat (PKPB) di Baling, Kedah**

dan beberapa negeri seperti Sabah, Selangor, Wilayah Persekutuan Kuala Lumpur, Putrajaya dan Labuan.

3. Sehingga kini, negeri Sabah mencatatkan jumlah kes tertinggi berbanding negeri-negeri lain. Mengambil kira situasi semasa, Kerajaan telah mengambil langkah-langkah seperti berikut:

- i. Mempertingkatkan aktiviti pengesanan kes dan kontak secara aktif di lapangan bagi memastikan kesemua yang terlibat disaring dan diasingkan daripada komuniti;
- ii. Menjalankan aktiviti nyah kuman dan nyah cemar;
- iii. Mempertingkatkan penguatkuasaan pematuhan Prosedur Operasi Standard (SOP);
- iv. Menekan pentingnya pematuhan Prosedur Amalan Standard (SOP) yang ditetapkan oleh Kerajaan;
- v. Memberi pendidikan kesihatan kepada masyarakat termasuklah nasihat-nasihat KKM;
- vi. Mempertingkatkan komunikasi risiko, termasuk memaklumkan situasi terkini COVID-19;
- vii. Meningkatkan kapasiti ujian makmal RT-PCR dan RTK Antigen;
- viii. Meningkatkan kapasiti katil di hospital COVID-19 serta Pusat Kuarantin dan Rawatan Berisiko Rendah (PKRC) termasuklah penyediaan hospital medan dengan kerjasama Angkatan Tentera Malaysia (ATM) di Tawau;
- ix. Meningkatkan kapasiti katil Unit Rawatan Rapi (ICU) dan alat mesin bantuan pernafasan (*ventilator*);
- x. Meningkatkan kapasiti dan mobilisasi tenaga sumber manusia Perubatan dan Kesihatan Awam; dan

- xi. Penyumberluaran (*outsourcing*) perkhidmatan Perubatan bagi kes-kes bukan COVID-19.

4. Walau bagaimanapun, saranan dan nasihat yang sering ditekankan oleh KKM haruslah terus dipatuhi kerana ini merupakan tanggungjawab sosial yang patut diamalkan sebagai usaha bersama mengekang jangkitan COVID-19. Jadikanlah nasihat-nasihat ini satu kebiasaan baharu dalam kehidupan harian:

- Elakkan 3S / 3C; iaitu elakkan kawasan yang sesak (*Crowded place*), elakkan kawasan yang sempit (*Confined space*) dan elak sembang atau bertutur dengan jarak yang dekat (*Close conversation*).
- Elakkan bersalaman / bersentuhan termasuk melagakan mana-mana bahagian tubuh badan sebagai menggantikan cara kebiasaan bersalam dan:
 - i. Amalkan etika batuk dan bersin;
 - ii. Dapatkan rawatan segera jika bergejala;
 - iii. Duduk di rumah dan elakkan kunjung-mengunjung;
 - iv. Lakukan aktiviti disinfeksi dan pembersihan di kawasan yang kerap disentuh.
- Patuhlah kepada S.O.P sebagai normal baharu iaitu:
 - i. S: Syarat-syarat seperti yang ditetapkan di bawah Perintah Kawalan Pergerakan Pemulihan (PKPP);
 - ii. O: Orang yang berisiko tinggi seperti kanak-kanak, bayi, warga emas dan orang kurang upaya (OKU) perlu dilindungi, individu tidak sihat dan bergejala dikehendaki segera menjalani pemeriksaan kesihatan;
 - iii. P: Penjarakan fizikal (*physical distancing*) sekurang-kurangnya 1 meter diamalkan pada setiap masa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 9 NOVEMBER 2020 (ISNIN)

SOALAN

Minta **MENTERI PENGANGKUTAN** menyatakan menyatakan perancangan Kementerian di dalam memulihkan sektor penerbangan awam di Malaysia selepas lumpuh akibat pandemik COVID-19.

JAWAPAN

Yang Dipertua,

1. Untuk makluman Yang Berhormat, penularan wabak COVID-19 telah menjejaskan industri penerbangan negara. Statistik menunjukkan trend penurunan permintaan penumpang domestik dan antarabangsa mulai 1 Mac 2020. Jumlah permintaan penumpang berkurangan daripada 280,321 sehari pada bulan Januari 2020 kepada 59,378 sehari pada bulan September 2020.
2. Berdasarkan semakan semula unjuran senario trafik penumpang Malaysia 2020, Suruhanjaya Penerbangan Malaysia (MAVCOM) menjangkakan jumlah tempat duduk perkhidmatan penerbangan penumpang akan berkurangan kepada 26.6 juta – 29.7 juta bersamaan - 72.8% hingga -75.6% pada tahun 2020 (berbanding 2019 – 109.2 juta penumpang).
3. Dalam hubungan ini, syarikat penerbangan dijangka memerlukan tempoh masa 3 tahun untuk pulih sepenuhnya dari impak wabak COVID-19, tertakluk kepada situasi semasa penularan wabak tersebut di dalam dan luar negara.
4. Sebagai persediaan kepada pembukaan sektor pengangkutan udara, Kerajaan melalui Pakej Rangsangan Ekonomi (Februari 2020) telah bersetuju antara lain supaya Malaysia Airport Holdings Berhad (MAHB) mengurangkan caj pendaratan dan parkir pesawat melalui mekanisme kontra.
5. Di samping itu, berdasarkan kepada saranan International Civil Aviation Organisation (ICAO), World Health Organisation (WHO) dan International Air Transport Association (IATA), semasa tempoh Perintah Kawalan Pergerakan Pemulihan (PKPP) yang bermula pada 10 Jun 2020 hingga 31 Ogos 2020, lebih banyak kelonggaran telah diberikan oleh pihak Kerajaan termasuk kebenaran untuk melakukan perjalanan rentas negeri dan pengecualian penjarakan fizikal dalam pesawat bagi semua perkhidmatan penerbangan berjadual dan tidak berjadual.

Kelonggaran ini telah meningkatkan permintaan terhadap perkhidmatan penerbangan udara bagi sektor domestik.

6. Selain itu, MOT, Kementerian Pelancongan, Seni dan Budaya (MOTAC) dan syarikat penerbangan terus bekerjasama bagi meningkatkan kesedaran dan keyakinan orang ramai untuk menggunakan perkhidmatan penerbangan bagi menggerakkan dan memulihkan sektor pelancongan domestik.

7. Bagi maksud menggerakkan sektor pelancongan antarabangsa, Kementerian Pengangkutan mengalu-alukan usaha Kerajaan dalam melaksanakan konsep *travel bubble* ke beberapa negara seperti Singapura, Brunei, Thailand, Vietnam, New Zealand, Australia, Korea Selatan dan Jepun. Melalui konsep tersebut, penerbangan dan penumpang dari mana-mana negara yang berada dalam kategori hijau akan dibenarkan memasuki Malaysia tertakluk kepada SOP tertentu seperti ujian saringan kesihatan yang ketat sebelum berlepas dan tiba di Malaysia perlu dipatuhi.

8. Dalam hubungan ini, cadangan *travel bubble* tersebut adalah tertakluk kepada rundingan yang sedang diadakan di antara Kementerian Kesihatan (MOH) dan Kementerian Luar Negeri dengan negara-negara terbabit.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 9 NOVEMBER 2020 (ISNIN)

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI ALAM SEKITAR DAN AIR** menyatakan pemantauan dan pelan tindakan berdasarkan pematuhan SOP kepada pematuhan Akta Kualiti Alam Sekitar 1974 bagi Lembah Silika di Dungun, Terengganu.

JAWAPAN

Tuan Yang Di-Pertua,

1. Kementerian melalui Jabatan Alam Sekitar tidak pernah menerima permohonan bagi cadangan pembangunan Lembah Silika di Dungun. Walau bagaimanapun, terdapat permohonan 2 projek EIA yang akan dijalankan di kawasan berkenaan (Marang dan Dungun) iaitu;

- i. Cadangan projek perlombongan silika yang akan dijalankan oleh Terengganu Silika (Marang) Sdn. Bhd - Laporan EIA telah diluluskan pada 23 Januari 2019.
- ii. Cadangan projek solar yang akan dijalankan oleh Coara Marang Sdn. Bhd – Laporan EIA sedang diproses oleh Jabatan Alam Sekitar Negeri Terengganu.

2. Jabatan Alam Sekitar akan menjalankan penguatkuasaan khusus terhadap pematuhan syarat-syarat kelulusan EIA bagi projek-projek tersebut sebaik sahaja kerja-kerja awalan dimulakan. Pematuhan umum kepada Akta Kualiti Alam Sekeliling 1974 akan turut dipantau. Sekian. Terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN HASANUDDIN B. MOHD YUNUS
(HULU LANGAT)**

TARIKH : 9 NOVEMBER 2020 (ISNIN)

SOALAN

DATUK HAJI HASANUDDIN BIN MOHD YUNUS [HULU LANGAT] minta **MENTERI DALAM NEGERI** menyatakan memperincikan peranan FRU PDRM dalam Ops Benteng, serta adakah kerajaan mempunyai perancangan penyelarasan elaun FRU setara dengan lain-lain unit/pasukan dalam PDRM memandangkan bebanan tugas FRU yang semakin bertambah saban hari.

JAWAPAN

Tuan Yang Di Pertua,

Untuk makluman ahli Yang Berhormat, sepanjang Op Benteng dilaksanakan, anggota FRU terlibat dalam penugasan di Bilik Gerakan National Task Force (NTF) di Ibu Pejabat Polis Diraja Malaysia dengan penugasan 3 orang anggota pada setiap hari bagi menyelaras maklumat operasi Op Benteng yang melibatkan pasukan PDRM sepanjang operasi dilaksanakan.

Bagi menjawab pertanyaan Yang Berhormat Hulu Langat berhubung perancangan penyelarasan elaun FRU, untuk makluman Yang Berhormat, Jabatan Pengurusan sedang meneliti cadangan penambahbaikan elaun yang telah dikemukakan oleh pihak Keselamatan Dalam Negeri dan Ketenteraman Awam (KDNKA) sebelum dimajukan untuk pertimbangan agensi pusat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI MAHDZIR BIN KHALID
[PADANG TERAP]**

TARIKH : 9 NOVEMBER 2020 (ISNIN)

SOALAN

DATO' SERI MAHDZIR BIN KHALID [PADANG TERAP] minta **MENTERI KESIHATAN** menyatakan bagaimanakah tahap kesiapsiagaan fasiliti dan kemudahan perubatan di Sabah setelah berlakunya peningkatan kes COVID-19 secara mendadak serta setakat ini dan apakah kapasiti hospitaliti dan kelengkapan kesihatan berdasarkan kemampuan maksimum yang mampu dirawat oleh hospital di setiap negeri.

JAWAPAN

Tuan Yang di-Pertua,

1. KKM sentiasa memandang serius situasi penularan pandemik COVID-19 khususnya di negeri Sabah sejak awal peningkatan bilangan kes yang bermula pada awal September 2020. Pelbagai usaha telah dijalankan seperti meningkatkan kapasiti fasiliti hospital dan mobilisasi aset serta sumber manusia. Usaha-usaha ini dilakukan bagi memastikan sistem rawatan kesihatan di negeri Sabah terus mampan dalam membendung penularan COVID-19. KKM membahagikan dua (2) Pelan Tindakan Pengurusan iaitu bagi Pesakit COVID-19 dan Pesakit Bukan COVID-19.

2. Bagi **Pelan Tindakan Pengurusan Pesakit COVID-19**, KKM telah meningkatkan kapasiti katil di hospital COVID-19 serta Pusat Kuarantin dan Rawatan Berisiko Rendah (PKRC), katil ICU, ventilator, kapasiti ujian makmal dan sumber manusia:

- i. Pada masa ini, Sabah mempunyai **9 Hospital COVID-19 dan 26 PKRC** dan jumlah **katil hospital COVID-19 dan PKRC telah ditingkatkan sebanyak 14 kali ganda iaitu** daripada 410 katil kepada 5,756 katil. Kadar penggunaan katil pada ketika ini adalah berada ditahap 39%;
- ii. **Jumlah katil ICU di negeri Sabah adalah sebanyak 127 unit di mana kadar penggunaannya adalah pada tahap 78%** berbanding 60 unit katil ICU dengan kadar penggunaan hanya 7% sahaja pada awal September 2020.
- iii. Bagi menampung peningkatan penggunaan katil ICU di Sabah, **beberapa kawasan klinikal di hospital telah diubahsuai dan disusun atur semula bagi tujuan rawatan terhadap pesakit yang memerlukan penjagaan kritikal (repurposing of clinical areas)**.
- iv. Terkini, terdapat 193 unit ventilator yang disediakan di mana kadar penggunaannya adalah pada tahap 37%. Penambahan jumlah ventilator ini adalah melalui peruntukan khas kerajaan dan hasil sumbangan pelbagai pihak.
- v. Meningkatkan kapasiti ujian makmal RT-PCR dan RTK Antigen.
- vi. Meningkatkan kapasiti dan mobilisasi tenaga sumber manusia Perubatan dan Kesihatan Awam

3. Manakala, bagi **Pelan Tindakan Pengurusan Pesakit Bukan COVID-19**, KKM melaksanakan Penyumberluaran (*outsourcing*) perkhidmatan Perubatan bagi kes-kes bukan COVID-19:

- i. Untuk memastikan kelangsungan perkhidmatan dan rawatan kepada kes-kes bukan COVID-19 tidak terjejas,

Jabatan Kesihatan Negeri Sabah telah berbincang dan menandatangani perjanjian dengan beberapa buah hospital swasta di Sabah untuk menyumberluar perkhidmatan kesihatan.

- ii. Terdapat 6 buah hospital KKM di Sabah yang terlibat dengan penyumberluaran perkhidmatan perubatan di Sabah yang meliputi 12 disiplin seperti berikut:

- a) *Paediatric Cardiology*
- b) *Paediatric Surgery*
- c) *Vascular Surgery*
- d) *Gynaecology*
- e) *Hepatobiliary Surgery*
- f) *Orthopedic*
- g) *Urology*
- h) *Cardiology*
- i) *Radiology*
- j) *Ophthalmology*
- k) *Cardiothoracic Surgery*
- l) *Neurosurgery*

- iii. Beberapa buah hospital swasta di Sabah telah dikenal pasti untuk menjalankan 1,833 pembedahan dan prosedur. Setakat ini 30 kes radiologi, 3 kes pembedahan neuro dan 4 kes kardiologi telah mula dihantar ke Hospital swasta bagi mendapatkan rawatan.

Tuan Yang Di-Pertua,

4. **Penubuhan Hospital Medan di Tawau dengan kapasiti 100 katil mula dibangunkan di Kompleks Sukan Tawau pada 16 Oktober 2020.** Hospital ini adalah hasil kerjasama KKM dengan pihak Angkatan Tentera Malaysia (ATM) bertujuan membantu Hospital Tawau dalam merawat kes-kes bukan COVID-19 terutamanya kes kecemasan yang memerlukan pembedahan dan juga kes Pediatrik dan Obstetrik dan Ginekologi.

SOALAN NO : 25

- i. Hospital ini mula beroperasi sejak 20 Oktober 2020 dengan permulaan kemasukan pesakit bukan COVID-19 sebanyak 4 orang; dan
- ii. Diharapkan dengan adanya hospital ini, lebih banyak katil di Hospital Tawau boleh digunakan untuk pesakit COVID-19 dan juga kelangsungan rawatan pembedahan terhadap pesakit bukan COVID-19 dapat diteruskan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 9 NOVEMBER 2020 (ISNIN)

SOALAN

PUAN HAJAH NATRAH BINTI ISMAIL [SEKIJANG] minta **MENTERI KESIHATAN** menyatakan tindakan yang akan diambil oleh pihak kementerian terhadap klinik pergigian kerajaan yang masih lagi di tempatkan di tingkat atas klinik-klinik kesihatan daerah sekali gus akan mendatangkan kesukaran kepada golongan OKU dan warga emas untuk menerima rawatan.

JAWAPAN

Tuan Yang di-Pertua,

1. Jumlah keseluruhan klinik pergigian kerajaan yang memberi rawatan kepada pesakit luar adalah sebanyak 706 buah klinik yang meliputi Klinik Pergigian (KP) yang berdiri sendiri (*Standalone* -dengan izin), KP di Klinik Kesihatan (KK), KP di Klinik Kesihatan Ibu & Anak, KP di Hospital, KP di Institusi Lain, KP di Pusat Transformasi Bandar (*Urban Tranformation Centre* (UTC) - dengan izin) dan KP di Pusat Transformasi Luar Bandar (*Rural Transformation Centre* (RTC) - dengan izin).

2. Daripada jumlah tersebut, **hanya 154 buah KP (21.8%) yang berada di tingkat atas Klinik Kesihatan dan tidak mempunyai kemudahan lif.** Pada dasarnya, peralatan pergigian seperti kerusi pergigian adalah berat dan dilekatkan secara tetap di sesuatu bilik rawatan serta mahal harganya. Oleh itu, dengan meletakkan peralatan pergigian ini ditingkat atas, ianya adalah lebih selamat jika berlaku sebarang bencana alam seperti banjir.

3. Untuk memastikan KP sedia ada mesra dengan golongan OKU dan Warga Emas, kemudahan rawatan pergigian akan ditambahbaik dari masa ke semasa. **Permohonan akan dibuat bagi penambahan sekurang-kurangnya satu bilik rawatan pergigian lengkap di aras bawah bagi Klinik Pergigian yang berada di tingkat atas Klinik Kesihatan dan tiada kemudahan lif.** Walau bagaimanapun, perkara ini adalah tertakluk kepada ruang sedia ada serta kebenaran / kelulusan untuk pengubahsuaian. Bagi fasiliti baharu pula, kemudahan lif telah dimasukkan ke dalam pelan piawai bagi Klinik Pergigian yang berada di tingkat atas Klinik Kesihatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG [TANJONG MALIM]

TARIKH : 9 NOVEMBER 2020 (KHAMIS)

SOALAN

TUAN CHANG LIH KANG [TANJONG MALIM] minta **MENTERI KESIHATAN** menyatakan sama ada Kerajaan sedia membantu anak-anak bukan warganegara yang dilahirkan di luar negara kepada warganegara Malaysia, dan menetap di sini, untuk menikmati kos rawatan kesihatan yang sama rata seperti warganegara Malaysia.

JAWAPAN

Tuan Yang di-Pertua,

1. **Pengenaan caj perubatan bagi pesakit yang berstatus warganegara Malaysia adalah berdasarkan Perintah Fi (Perubatan) 1982 / Perintah Fi (Perubatan) (Pindaan) 2017.** Pesakit yang mendapatkan perkhidmatan kesihatan di fasiliti Kementerian Kesihatan Malaysia perlu mengemukakan bukti dokumen seperti kad pengenalan (MyKid / MyKad) atau sijil kelahiran Malaysia yang mencatatkan status warganegara Malaysia bagi menikmati caj warganegara.
2. **Pesakit yang gagal mengemukakan bukti dokumen berkaitan akan dikenakan caj warga asing berdasarkan Perintah Fi (Perubatan) (Kos Perkhidmatan) 2014.**
3. Bagi kanak-kanak berstatus bukan warganegara yang berumur 12 tahun ke bawah, lahir di Malaysia dan memegang Sijil Kelahiran Malaysia serta bapa atau ibunya adalah seorang warganegara atau pemastautin tetap di Malaysia adalah layak untuk menikmati caj warganegara.
4. Selain itu, kanak-kanak bukan warganegara yang berumur sehingga 18 tahun yang diambil sebagai anak angkat kepada pasangan suami isteri warganegara dengan sijil pengangkatan anak yang sah adalah turut diberikan peluang menikmati kadar caj warganegara.
5. **Sehubungan itu bagi kanak-kanak berstatus bukan warganegara di mana ibu atau bapa kepada kanak-kanak berkenaan adalah berstatus warganegara, mereka akan dikenakan caj warga asing.** Kementerian ini menyarankan agar ibu bapa kanak-kanak tersebut merujuk kepada Jabatan Pendaftaran Negara bagi mendapatkan pengesahan taraf kewarganegaraan dan dokumen pengenalan diri berkenaan bagi membolehkan kanak-kanak tersebut menikmati kemudahan caj warganegara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 9 NOVEMBER 2020 (ISNIN)

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI KESIHATAN** menyatakan kajian menunjukkan pada tahun 2020, penduduk di Malaysia dijangka akan mencecah 33.7juta orang di mana 3.8 juta (11.8%) adalah warga emas. Penyakit mata sering berlaku di kalangan warga emas. Nyatakan jumlah pesakit yang menghadapi penyakit mata Katarak, Glaukoma dan Diabetik Retinopati yang berdaftar di hospital Kerajaan bagi tahun 2018, 2019 dan 2020.

JAWAPAN

Tuan Yang di-Pertua,

1. Berdasarkan maklumat yang diperolehi daripada *National Eye database*, **jumlah pesakit yang menghadapi penyakit Katarak pada tahun 2018 adalah sebanyak 50,682 orang dan menunjukkan sedikit peningkatan kepada 51,960 orang bagi tahun 2019**. Manakala, bagi tempoh Januari hingga Julai 2020, jumlah pesakit Katarak adalah 14,926 orang.
2. Bagi pesakit yang menghadapi penyakit Glaukoma, **sebanyak 71,006 pesakit dicatatkan bagi tahun 2018 dan menurun kepada 59,103 bagi tahun 2019**. Manakala, bagi tempoh Januari hingga Julai 2020, seramai 1,388 pesakit yang menghadapi penyakit Glaukoma dicatatkan.
3. Dan yang terakhir, **jumlah pesakit Diabetik Retinopati bagi tahun 2018 adalah seramai 27,713 orang dan sedikit meningkat kepada 27,238 pada tahun 2019**. Manakala, bagi tempoh Januari hingga Julai 2020, seramai 7,544 pesakit yang menghadapi penyakit Diabetik Retinopati telah dicatatkan di hospital Kementerian Kesihatan Malaysia.
4. Keseluruhan data bagi tahun 2020 menunjukkan pengurangan pesakit yang amat ketara disebabkan oleh penurunan jumlah pesakit yang mengunjungi hospital disebabkan oleh penularan pandemik Covid-19. Penyakit mata seperti Katarak, Glaucoma dan Diabetik Retinopati juga boleh berlaku di kalangan golongan muda khususnya mereka yang mengalami masalah *Diabetes Mellitus*.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN RUSNAH BINTI ALUAI [TANGGA BATU]

TARIKH : 9 NOVEMBER 2020 (ISNIN)

SOALAN

PUAN RUSNAH BINTI ALUAI [TANGGA BATU] minta **MENTERI KESIHATAN** menyatakan Kementerian bercadang menubuhkan Hospital Perkhidmatan Kecemasan untuk menangani masalah COVID-19 dan sebagainya, seperti yang dilakukan oleh United Kingdom semasa perang.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa komited dalam menangani penularan pandemik COVID-19 yang semakin meningkat di negara ini khususnya di Sabah. Justeru, pelbagai usaha telah dijalankan seperti meningkatkan kapasiti fasiliti hospital dan mobilisasi aset serta sumber manusia. Selain itu, usaha ke arah meningkatkan kelangsungan rawatan terhadap pesakit bukan COVID-19 juga diteruskan. Ini termasuk **penubuhan Hospital Medan di Tawau di mana ia adalah hasil kerjasama KKM dengan pihak Angkatan Tentera Malaysia (ATM).**

2. **Penubuhan hospital ini bertujuan membantu Hospital Tawau dalam merawat kes-kes bukan COVID-19 terutamanya kes-kes kecemasan yang memerlukan pembedahan. Jabatan lain yang turut terlibat adalah Perubatan, Pediatrik, Ortopedik dan Obstetrik dan Ginekologi.** Oleh yang demikian, penubuhan Hospital Medan ini secara tidak langsung dapat membantu perawatan terhadap pesakit COVID-19.

3. **Hospital Medan dengan kapasiti 100 katil mula dibangunkan di Kompleks Sukan Tawau pada 16 Oktober 2020.** Dalam masa 4 hari, hospital ini berjaya dibangunkan dan dilengkapi dengan katil dan peralatan perubatan. Dalam masa yang sama, mobilisasi sumber manusia juga telah diusahakan bagi menjayakan pembangunan hospital ini.
4. Mobilisasi peralatan perubatan dan sumber manusia serta pentadbiran hospital adalah gabungan bersama KKM dan pihak ATM. **Hospital Medan mula beroperasi sejak 20 Oktober 2020 dengan permulaan kemasukan pesakit bukan COVID-19 sebanyak 4 orang.**
5. **Dalam fasa kedua pelaksanaan, pihak ATM merancang untuk mewujudkan modul 4 katil ICU dan 2 bilik bedah untuk perawatan kepada pesakit bukan COVID-19.** Diharapkan dengan adanya hospital ini, lebih banyak katil di Hospital Tawau boleh digunakan untuk pesakit COVID-19 dan juga kelangsungan rawatan pembedahan terhadap pesakit bukan COVID-19 dapat diteruskan.
6. Selain itu, **KKM juga bekerjasama dengan pihak ATM dalam menubuhkan makeshift hospital di Kompleks Penjara Kepayan, Kota Kinabalu dan di Kompleks Penjara Pokok Sena, Kedah** bagi menampung peningkatan kes COVID-19. *Makeshift Treatment Centre (MTC)* Penjara Kepayan dengan kapasiti 2,700 katil mula beroperasi sejak 25 Oktober 2020 dengan kadar penggunaan katil adalah sebanyak 57% pada 27 Oktober 2020. Daripada jumlah 2,700 sebanyak 300 dijadikan katil ICU yang akan menempatkan pesakit-pesakit kategori 3 dan 4. Manakala *Makeshift Treatment Centre* di Kompleks Penjara Pokok Sena juga mula beroperasi sejak 25 Oktober 2020 dengan kekuatan kapasiti 236 katil termasuk 6 katil rawatan rapi bagi kategori banduan yang positif COVID-19 dalam kategori 3 dan 4.
7. **Pada masa kini, kadar penggunaan katil semakin menurun dengan kadar terkini pada 5.7% sahaja.** Oleh yang demikian dengan penubuhan Makeshift Treatment Centre tersebut dapat membantu KKM dalam menangani kes COVID-19 yang semakin meningkat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : SYED SADDIQ BIN SYED ABDUL RAHMAN
[MUAR]**

TARIKH : 9 NOVEMBER 2020 (SELASA)

SOALAN

SYED SADDIQ BIN SYED ABDUL RAHMAN [MUAR] minta **MENTERI KESIHATAN** menyatakan apakah langkah-langkah yang telah diambil oleh Kementerian Kesihatan untuk meningkatkan penyertaan perokok yang ingin berhenti merokok ke dalam program berhenti merokok seperti mQuit dan sejauh manakah keberkesanan langkah-langkah tersebut.

JAWAPAN

Tuan Yang di-Pertua,

1. Pihak KKM telah mengambil **tiga langkah utama** bagi meningkatkan jumlah penyertaan perokok yang ingin berhenti merokok ke dalam program berhenti merokok iaitu:

- i. **Meningkatkan kebolehcapaian perkhidmatan** berhenti merokok dengan memperluaskan perkhidmatan di klinik kesihatan dan hospital KKM yang menjalankan rawatan berhenti merokok serta menjalinkan kerjasama pintar bersama perkhidmatan swasta dalam menjalankan perkhidmatan berhenti merokok;
- ii. **Menjalankan aktiviti promosi** bagi menghebahkan perkhidmatan berhenti merokok melalui media cetak dan media sosial; dan

- iii. **Menyediakan laman sesawang khusus** iaitu portal jomquit.com melalui kerjasama pintar antara agensi swasta dan badan profesional bagi memudahkan interaksi serta pendaftaran ke perkhidmatan berhenti merokok mQuit.

2. Perkhidmatan Berhenti Merokok mQuit telah diperluaskan bagi meningkatkan kebolehcapaian perkhidmatan berhenti merokok bukan sahaja di klinik kesihatan dan hospital kerajaan malahan ke perkhidmatan swasta selaras dengan Artikel 14, *World Health Organization Framework Convention on Tobacco Control (WHO FCTC)*. Perkhidmatan berhenti merokok di perkhidmatan swasta dijalankan secara perkongsian pintar di antara Kementerian Kesihatan Malaysia dengan badan professional, badan bukan kerajaan dan agensi swasta dalam menggalakkan pendaftaran perokok terutama di sektor pekerjaan melalui sistem rangkaian khusus atau *Uberization*

3. Bagi menggalakkan penyertaan perokok ke Perkhidmatan Berhenti Merokok mQuit, informasi berkaitan pautan ke laman sesawang '**jomquit**' telah dilaksanakan melalui paparan khusus di papan tanda larangan merokok. Papan tanda larangan merokok ini telah dipamerkan di semua tempat-tempat larangan merokok. Sehingga kini, lebih 100,000 keping tanda larangan merokok baharu telah diedar dan dipamerkan di seluruh negara.

4. Selaras dengan situasi semasa pandemik COVID-19, informasi berkaitan merokok dan jangkitan COVID-19 dan cara penyertaan kepada Perkhidmatan Berhenti Merokok mQuit juga telah dimuatnaik melalui aplikasi MySejahtera.

5. Selain itu, bagi memudahkan akses ke pendaftaran Perkhidmatan Berhenti Merokok mQuit, satu laman sesawang khusus iaitu portal '**jomquit.com**' telah dibangunkan menerusi kerjasama pintar bersama-sama agensi swasta dan badan profesional. Capaian portal jomquit.com ini juga telah di masukkan di bawah aplikasi MySejahtera.

Tuan Yang di-Pertua,

6. Kesemua langkah-langkah yang telah dijalankan di atas telah menunjukkan keberkesanan seperti berikut:

- a. Jumlah perokok yang mendaftar bagi mendapatkan rawatan berhenti merokok telah meningkat daripada 10,240 orang pada tahun 2017 kepada 20,032 orang pada tahun 2018 dan seterusnya kepada 22,601 orang pada tahun 2019.
- b. Melalui promosi penggalakkan berhenti merokok semasa pandemik COVID-19, seramai lebih 3,442 orang telah mendaftar melalui laman sesawang Jomquit bermula 1 Januari 2020 sehingga 21 Oktober 2020 berbanding dengan keseluruhan tahun 2019 iaitu seramai 1,678 orang perokok.
- c. Daripada jumlah pendaftaran pada tahun 2020 (3,422), sebanyak 3,254 orang atau 95% telah mendaftar sepanjang tempoh pelaksanaan Perintah Kawalan Pergerakan (PKP) bermula 18 Mac 2020.

7. Kesemua langkah-langkah yang dinyatakan telah dilaksanakan oleh rakan kongsi strategik Perkhidmatan Berhenti Merokok mQuit tanpa sebarang implikasi kewangan kepada Kementerian Kesihatan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN DR DZULKEFLY B. AHMAD
(KUALA SELANGOR)**

TARIKH : 9 NOVEMBER 2020 (ISNIN)

SOALAN

TUAN DR DZULKEFLY B. AHMAD [KUALA SELANGOR] minta
MENTERI DALAM NEGERI menyatakan :-

- (a) bilakah Rang Undang-undang Suruhanjaya Bebas Tatakelakuan Polis (IPCC) akan dibentangkan; dan
- (b) apakah asas kepada perubahan besar yang dilakukan Kerajaan.

JAWAPAN

Tuan Yang Di Pertua,

Untuk makluman Ahli Yang Berhormat, Rang Undang-undang Suruhanjaya Bebas Tatakelakuan Polis (IPCC) ini telah dibentangkan di Parlimen untuk bacaan kali pertama pada 26 Ogos 2020 yang lalu.

Asas kepada perubahan besar yang dilakukan terhadap RUU IPCC ini ialah ia mengamalkan prinsip pengasingan kuasa selaras dengan sistem pentadbiran negara. IPCC hanya berperanan untuk menjalankan siasatan dan mengesyorkan tindakan tatatertib ke atas anggota pasukan polis

SOALAN NO : 31

kepada SPP tanpa menentukan jenis hukuman. Ini menjadikan kuasa “*hire and fire*” bagi anggota pasukan polis adalah kekal di bawah bidang kuasa badan yang sama.

Kerajaan berkeyakinan bahawa Suruhanjaya Bebas Tatakelakuan Polis (IPCC) yang akan ditubuhkan kelak mampu menangani salah laku anggota pasukan polis kerana ianya bersifat tertumpu kepada satu agensi penguatkuasa sahaja iaitu Polis Diraja Malaysia.

RUU IPCC ini juga digubal berdasarkan Laporan Jawatankuasa Pilihan Khas (JPK) RUU IPCMC, ulasan pihak berkepentingan dan hasil lawatan delegasi Malaysia ke Independent Office for Police Conduct (IOPC) dan The Directorate of Professional Standards (DPS) Metropolitan Public Service United Kingdom pada 17-21 Februari 2020 yang lalu.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' ABDULLAH SANI BIN ABDUL
HAMID [KAPAR]**

TARIKH : 9 NOVEMBER 2020 (ISNIN)

SOALAN

DATO' ABDULLAH SANI BIN ABDUL HAMID [KAPAR] minta **MENTERI SUMBER MANUSIA** menyatakan jumlah wang yang telah dibelanjakan dan berapa jumlah pekerja yang telah menerima faedah Sistem Insurans Pekerja (SIP) yang terjejas pendapatan akibat penguatkuasaan Perintah Kawalan Pergerakan (PKP) pada 18 Mac 2020 yang lalu.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, berdasarkan rekod **Sistem Insurans Pekerjaan (SIP)**, seramai 91,027 orang pekerja telah kehilangan pekerjaan dari Januari hingga 30 Oktober 2020.
2. Sehingga 30 Oktober 2020, sebanyak **RM290.1 juta** telah diluluskan untuk dibayar kepada pekerja yang kehilangan pekerjaan serta melibatkan sebanyak **187,258 tuntutan** daripada penerima faedah iaitu Elaun Mencari Pekerjaan (EMP) sebanyak **169,212** tuntutan, Elaun Bekerja Semula Awal sebanyak (EBSA) **17,388** tuntutan dan Elaun Pendapatan Berkurangan (EPB) sebanyak **658** tuntutan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DORELL LEIKING
[PENAMPANG]**

TARIKH : 9 NOVEMBER 2020 (ISNIN)

SOALAN

DATUK IGNATIUS DORELL LEIKING [PENAMPANG] minta **MENTERI ALAM SEKITAR DAN AIR** menyatakan sebab-sebab yang menyebabkan kelewatan penyiapan empat pakej Projek Tebatan Banjir di Penampang

JAWAPAN

Tuan Yang Di-Pertua,

1. Kerajaan telah meluluskan Projek Pembangunan Lembangan Sungai Bersepadu (PLSB) Sungai Moyog (pakej 1 dan pakej 3), Rancangan Tebatan Banjir Sungai Tebongon (Kg. Teguli), Sabah dan Rancangan Tebatan Banjir Bandar Sierra, Lembangan Sungai Telipok, Sabah bagi mengurangkan risiko banjir di sebahagian kawasan di Penampang.
2. Walau bagaimanapun, pelaksanaan projek di tapak bina mengalami kelewatan setelah Kerajaan melaksanakan Perintah Kawalan Pergerakan (PKP) bermula dari 18 Mac 2020 sehingga 12 Mei 2020 dan juga Perintah Kawalan Pergerakan Bersyarat (PKPB) pada 13 Mei 2020 sehingga 9 Jun 2020.

NO. SOALAN : 33

3. Kerja-kerja pembinaan di tapak telah mula beroperasi semula pada 9 Jun 2020. Pihak kontraktor perlu membuat perancangan semula bagi mematuhi *standard operation procedure* (SOP) yang ditetapkan oleh Kerajaan semasa melaksanakan kerja pembinaan ditapak.

4. Selain daripada itu, terdapat beberapa isu lain yang turut menyumbang kepada kelewatan kemajuan kerja ditapak antaranya ialah isu penempatan setingan di jajaran parit yang akan dibina, Pengalihan utiliti kabel Syarikat Sabah Elektrik Sdn Bhd, Jabatan Air Negeri Sabah dan terdapat beberapa lokasi pembinaan yang melibatkan perkongsian *reserve of work* (row) dengan projek pembinaan Pan Borneo.

Sekian. Terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN CHAN FOONG HIN
(KOTA KINABALU)**

TARIKH : 9 NOVEMBER 2020 (ISNIN)

SOALAN

TUAN CHAN FOONG HIN [KOTA KINABALU] minta **MENTERI DALAM NEGERI** menyatakan penjelasan dasar Kerajaan berkenaan pengusiran Pendatang Tanpa Izin di Sabah. Jelaskan pernyataan Menteri Dalam Negeri Hamzah Zainuddin yang menyatakan bahawa “Tapi sebelum hantar (PTI pulang), kena pastikan Joniston menang dulu. Mana boleh hantar (PTI pulang) kalau kalah” yang telah tular di media sosial.

JAWAPAN

Tuan Yang Di-Pertua,

Kerajaan telah menggiatkan tindakan penguatkuasaan serta pengusiran ke atas pendatang asing tanpa izin (PATI) di Sabah melalui Operasi Bersepadu yang melibatkan beberapa agensi iaitu Majlis Keselamatan Negara (MKN) Negeri Sabah, Eastern Sabah Security Command (ESSCOM), Jabatan Imigresen Malaysia (JIM), Polis DiRaja Malaysia (PDRM) dan Agensi Penguatkuasaan Maritim Malaysia.

Kesungguhan Kerajaan untuk mengatasi isu PATI ini dapat dilihat melalui tindakan pengusiran yang masih dilaksanakan walaupun negara sedang menghadapi pandemik Covid-19 dan jumlah pengusiran yang dilaksanakan bermula dari Januari hingga September 2020 adalah berjumlah 6,859 orang, melibatkan PATI dari negara Filipina, Indonesia dan lain-lain.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB PUAN KASTHURIRAANI A/P PATTO
(BATU KAWAN)**

TARIKH : 9 NOVEMBER 2020 (ISNIN)

SOALAN

PUAN KASTHURIRAANI A/P PATTO [BATU KAWAN] minta **MENTERI DALAM NEGERI** menyatakan bilangan kematian dalam lokap. penjara, tahanan imigresen dan SPRM mengikut pecahan kewarganegaraan, etnik, jantina, umur dan negeri yang terkini dan apakah langkah-langkah pencegahan yang akan dan sedang diambil oleh PDRM, SPRM dan Imigresen untuk memastikan tiada lagi kematian dalam tahanan.

JAWAPAN

Tuan Yang Di Pertua,

Untuk makluman Ahli Yang Berhormat, statistik terkini kematian orang tahanan dalam lokap Polis Diraja Malaysia (PDRM), penjara dan depot tahanan Imigresen bermula dari 1 Januari 2020 hingga 30 September 2020 adalah seramai 335 tahanan yang mana pecahannya adalah 9 tahanan lokap PDRM, 296 tahanan penjara dan 30 tahanan di depot Imigresen.

Antara langkah-langkah yang diambil pihak PDRM untuk meminimalkan kes-kes kematian dalam lokap khususnya yang disabitkan oleh penyakit adalah dengan menyediakan SOP yang lebih ketat termasuk dalam menguruskan tahanan sakit, rondaan yang lebih kerap di sel pada waktu malam, penyediaan bilik rawatan dan pembantu perubatan serta penambahan kakitangan yang menguruskan tahanan.

SOALAN NO : 35

Keselamatan banduan juga sememangnya merupakan antara tanggungjawab utama Jabatan Penjara Malaysia. Oleh itu langkah-langkah kawalan, pemeriksaan, pengasingan penempatan, ujian psikologi, risikan maklumat, pemantauan rapi serta kemudahan kesihatan sentiasa dilakukan untuk mengelakkan keselamatan seseorang banduan terancam. Malah Jabatan Penjara mempunyai standard prosedur kerja atau perintah tetap Komisioner Jeneral Penjara bagi tujuan pengurusan semua aspek banduan termasuklah keselamatan.

Tuan Yang Di Pertua,

Jabatan Imigresen Malaysia (JIM) juga sentiasa menitikberatkan hal ehwal kebajikan tahanan di Depot Tahanan Imigresen dengan menyediakan penjagaan khas serta perlindungan terhadap mereka semasa dalam tahanan. Prosedur pengurusan tahanan yang berada dalam Depot Tahanan Imigresen adalah berpandukan Arahan Tetap Ketua Pengarah Imigresen Mengenai Prosedur Pentadbiran dan Pengurusan Depot Imigresen.

Sebagai langkah bagi memastikan tahap kesihatan yang baik di kalangan tahanan, pihak JIM telah bekerjasama dengan Kementerian Kesihatan Malaysia (KKM) untuk menempatkan 14 orang Penolong Pegawai Perubatan di Depot Tahanan Imigresen di seluruh negara bagi memberikan rawatan awal kepada tahanan. Klinik kesihatan yang berhampiran telah dikenalpasti dan dipilih oleh KKM bagi memperkukuh perkhidmatan kesihatan di Depot Tahanan Imigresen serta berperanan sebagai pusat rujukan oleh Penolong Pegawai Perubatan yang dilantik dan sebagai pembekal keperluan perubatan ke depot-depot.

Pemantauan kesihatan secara berkala turut dilakukan oleh KKM ke Depot Tahanan Imigresen dari semasa ke semasa. Selain itu, JIM turut melaksanakan tindakan pencegahan pencegahan dan aktiviti kawalan untuk memastikan kesejahteraan tahanan di Depot Tahanan Imigresen.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI MUJAHID BIN YUSOF RAWA
[PARIT BUNTAR]**

TARIKH : 9 NOVEMBER 2020 (ISNIN)

SOALAN

DATUK SERI MUJAHID BIN YUSOF RAWA [PARIT BUNTAR] minta **MENTERI KESIHATAN** menyatakan sekiranya Kementerian berhasrat untuk mempertimbangkan penyaluran pendapatan daripada duti eksais rokok dan tembakau untuk membiayai kos program berhenti merokok seperti program mQuit.

JAWAPAN

Tuan Yang di-Pertua,

1. Berhubung sumber dana alternatif seperti penyaluran pendapatan daripada duti eksais rokok dan tembakau untuk membiayai kos program berhenti merokok, **Memorandum Jemaah Menteri (MJM) berkaitan Cadangan Kenaikan Cukai Rokok Secara Berkala telah dibentangkan pada tahun 2015.** Di dalam MJM tersebut, keperluan kewangan bagi membiayai kos rawatan berhenti merokok dengan menggunakan peruntukan khusus daripada hasil kutipan duti eksais rokok dan tembakau telah dicadangkan. Namun, **ianya tidak dipersetujui kerana di atas prinsip bahawa wang** dikumpulkan adalah di bawah konsep kewangan disatukan dan pihak KKM boleh memohon peruntukan daripada pihak Kementerian Kewangan (MOF) mengikut prosedur dan proses kewangan biasa.

2. Seterusnya, pihak KKM juga telah membuat **permohonan bagi menampung kos rawatan berhenti merokok di bawah program Dasar Baru**. Sebagai contoh, pada tahun 2020 sebanyak RM 6.5 juta telah dipohon. Namun, **pihak KKM diminta untuk menggunakan peruntukan di bawah program belanja mengurus sedia ada**.

3. Sebagai perancangan, pada tahun 2020 dan sebagai alternatif kepada penambahan peruntukan, pihak KKM telah melaksanakan satu inisiatif di bawah *Public Private Partnership (PPP)* bersama badan professional, badan bukan kerajaan (NGO) dan agensi swasta di bawah program Perkhidmatan Berhenti Merokok mQuit. Perkhidmatan Berhenti Merokok mQuit telah bermula sejak fasa satu iaitu tahun 2015 hingga 2017. Fasa kedua pada 2017 hingga 2020 dan bakal memasuki fasa ketiga bermula 2021 sehingga 2025 dengan termetrainya Memorandum Persefahaman bersama pihak KKM. **Peruntukan kewangan bagi melaksanakan semua aktiviti dalam setiap fasa adalah ditanggung oleh badan professional, badan bukan kerajaan (NGO) dan agensi swasta yang terlibat**.

4. Pihak KKM juga telah menetapkan dasar agar rawatan berhenti merokok dapat dijalankan secara integrasi dalam rawatan penyakit kronik lain seperti darah tinggi, penyakit jantung, kencing manis dan lain-lain. Ini adalah bagi memastikan agar rawatan berhenti merokok dapat diperluaskan bukan sahaja di klinik kesihatan malahan di semua hospital KKM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN CHARLES ANTHONY SANTIAGO
[KLANG]**

TARIKH : 9 NOVEMBER 2020 (ISNIN)

SOALAN

TUAN CHARLES ANTHONY SANTIAGO [KLANG] minta **MENTERI SUMBER MANUSIA** menyatakan jumlah pendapatan bagi Sistem Insurans Pekerjaan (SIP) dan sama ada peruntukan tersebut mencukupi untuk membayar pampasan kepada pekerja yang hilang kerja akibat pandemik COVID-19. Berapakah jumlah pekerja yang menerima manfaat SIP dari bulan Mac-Okttober 2020, termasuk permohonan berstatus gagal dan mengapa pihak majikan tidak berminat untuk menyertai SIP.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, sehingga 30 Oktober 2020, jumlah dana Sistem Insurans Pekerjaan (SIP) masih mencukupi untuk menampung tuntutan kes kehilangan pekerjaan iaitu rezab terkumpul adalah sebanyak **RM1.3 billion**. Sehingga tarikh yang sama juga, sebanyak **RM290.1 juta** telah diluluskan untuk dibayar kepada pekerja yang kehilangan pekerjaan melibatkan sebanyak **187,258** tuntutan daripada penerima faedah iaitu Elaun Mencari Pekerjaan (EMP) sebanyak **169,212** tuntutan, Elaun Bekerja Semula Awal (EBSA) sebanyak **17,388** dan Elaun Pendapatan Berkurangan (EPB) sebanyak **658** tuntutan.

2. Setakat 30 Oktober 2020, PERKESO telah menolak sebanyak **16,676** permohonan faedah SIP. Punca tertinggi yang menyebabkan permohonan ditolak adalah kerana tidak mencukupi syarat kelayakan caruman dan tamat tempoh kontrak.

3. Bagi meningkatkan lagi kesedaran dalam kalangan majikan, PERKESO akan meneruskan aktiviti promosi berkenaan kebaikan dan faedah Sistem Insurans Pekerjaan (SIP). Dengan itu, majikan tidak akan dapat menggunakan alasan tidak mempunyai pengetahuan mengenai kewajipan mencarum di bawah Akta Sistem Insurans Pekerjaan 2017 [Akta 800].

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN YAMANI HAFEZ BIN MUSA [SIPITANG]

TARIKH : 9 NOVEMBER 2020 (ISNIN)

SOALAN

TUAN YAMANI HAFEZ BIN MUSA [SIPITANG] minta **MENTERI KESIHATAN** menyatakan cadangan untuk menggantikan kelengkapan perubatan hospital-hospital di Sabah dan Sarawak yang berkeadaan daif bagi memberi perkhidmatan terbaik kepada rakyat di kedua-dua negeri tersebut.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa mengambil berat tentang kualiti perkhidmatan hospital-hospital di bawah KKM termasuk di Negeri Sabah dan Sarawak terutamanya dalam menghadapi wabak Covid-19.

2. Bagi tahun 2020, **KKM telah memperuntukkan sebanyak RM157.88 juta kepada negeri Sabah dan Sarawak bagi tujuan penggantian peralatan perubatan usang dan penambahan peralatan perubatan baharu.** Peruntukan tersebut merangkumi penggantian dan perolehan alatan perubatan seperti:

- a) Mesin Hemodialisis;
- b) LINAC (*Linear Accelerator*) – mesin rawatan kanser;
- c) MRI (*Magnetic Resonance Imaging*);
- d) Alat Bantuan Pernafasan (Ventilator);
- e) Katil ICU;
- f) Patient Monitor; dan
- g) PAPR (*Powered Air Purifying Respirator*)

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 9 NOVEMBER 2020 (ISNIN)

SOALAN

PUAN HAJAH FUZIAH BINTI SALLEH [KUANTAN] minta **MENTERI KESIHATAN** menyatakan status profesion Juruteknologi Makmal Perubatan di Kementerian Kesihatan Malaysia yang telah memohon pertimbangan pihak Kementerian di dalam menaik taraf laluan kerjaya skim Juruteknologi Makmal Perubatan (JTMP) yang jauh ketinggalan berbanding skim paramedik lain. Mohon perincian perancangan Kementerian Kesihatan demi menjamin skim JTMP dan kebajikan seluruh anggota JTMP.

JAWAPAN

Tuan Yang di-Pertua,

1. Kementerian Kesihatan Malaysia (KKM) telah menyediakan Cadangan Pewujudan Skim Perkhidmatan Bersepadu melibatkan penggabungan skim perkhidmatan Juruteknologi Makmal Perubatan dengan Penolong Pegawai Sains dan Pegawai Sains (Biomedikal, Forensik, Embriologi, Genetik, Biokimia/ Kimia Hayat dan Mikrobiologi).

2. KKM telah mengemukakan cadangan tersebut kepada Jabatan Perkhidmatan Awam (JPA) dan masih dalam pertimbangan kerana JPA sedang menjalankan kajian skim perkhidmatan secara menyeluruh termasuk skim perkhidmatan ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN SIVAKUMAR A/L VARATHARAJU
NAIDU (BATU GAJAH)**

TARIKH : 9 NOVEMBER 2020 (ISNIN)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI DALAM NEGERI** menyatakan langkah-langkah yang telah diambil untuk menyekat penyebaran COVID-19 di kalangan banduan-banduan di penjara seluruh negara. Berapakah jumlah banduan yang telah dijangkiti COVID-19 mengikut negeri dan berapa ramai yang telah dibebaskan demi mengurangkan kesesakan di penjara sejak bulan Ogos 2020.

JAWAPAN

Tuan Yang Di Pertua,

Untuk makluman Ahli Yang Berhormat pihak Kementerian Dalam Negeri (KDN) dan Jabatan Penjara Malaysia telah mengambil beberapa pendekatan proaktif bagi mengekang penularan wabak COVID-19 di institusi penjara. Sebagai langkah pencegahan, Jabatan Penjara Malaysia telah mengeluarkan Perintah Tetap Komisioner Jeneral Penjara serta Pelan Kontingensi: Tatacara Mencegah Dan Bertindak Dalam Menghadapi Penularan Wabak COVID-19 Di Dalam Penjara. Dalam menghadapi pandemik COVID-19 ini, semua anggota Jabatan Penjara Malaysia dipastikan mematuhi Prosedur Operasi Standard (SOP) yang telah ditetapkan dan berusaha meningkatkan tahap kecekapan dalam menghadapi situasi tersebut.

Jabatan Penjara Malaysia turut mempunyai Perintah Tetap Jabatan berhubung dengan ujian saringan COVID-19, yang mana telah menetapkan agar semua banduan sebelum diterima masuk ke penjara perlu mempunyai keputusan ujian saringan COVID-19. Perintah Tetap ini selaras dengan keputusan Sidang Khas Majlis Keselamatan Negara (MKN) COVID-19 bil. 29 tahun 2020 pada 15 Oktober 2020 yang telah bersetuju agar dilaksanakan ujian pengesahan COVID-19 kepada semua banduan semasa kemasukan bagi memastikan penularan COVID-19 di penjara dapat dicegah sepenuhnya.

Selain itu, Jabatan Penjara Malaysia juga telah mengambil langkah dalam mematuhi SOP yang telah ditetapkan oleh Kementerian Kesihatan Malaysia (KKM) untuk merawat, melaksanakan kuarantin dan mencegah penularan wabak tersebut kepada banduan dan kakitangan.

Seterusnya bagi mengurangkan tahap kebolehjangkitan COVID-19 di kalangan banduan serta mengurangkan kesesakan, Jabatan Penjara Malaysia bersama KDN sedang dalam proses memuktamadkan cadangan penempatan banduan sabitan dan reman kategori risiko keselamatan minima, di beberapa bekas kem Pusat Latihan Khidmat Negara (PLKN) yang

SOALAN NO : 40

akan diwartakan sebagai Penjara Sementara di bawah Seksyen 8 (1), Akta Penjara 1995 dan berfungsi sebagai *Admission Prison*.

Bagi tujuan yang sama iaitu mengurangkan tahap kebolehjangkitan, Jabatan Penjara Malaysia turut mewujudkan pusat-pusat transit di institusi penjara untuk penempatan banduan yang baru diterima masuk ke institusi tersebut dengan mengambilkira keperluan pengasingan berdasarkan tarikh-tarikh kemasukan.

Berdasarkan kepada statistik Jabatan Penjara Malaysia sehingga 2 November 2020 jumlah positif COVID-19 dalam kalangan banduan di penjara seluruh negara adalah sebanyak 1,156 kes.

Kerajaan secara dasarnya tidak mempunyai cadangan untuk memendekkan tempoh tahanan seseorang banduan semasa pandemik COVID-19 ini. Walau bagaimanapun, hak banduan yang layak untuk Pelepasan Secara Perintah Parol, Pembebasan Secara Lesen dan pembebasan melalui pengampunan oleh Lembaga Pengampunan Negeri-negeri tidak dihalang dan masih boleh diberikan dalam tempoh pandemik ini. Pada masa yang sama, pembebasan biasa iaitu seseorang banduan telah selesai menjalani tempoh hukuman, masih dilaksanakan. Sebelum setiap pembebasan tersebut dilaksanakan, banduan berkaitan akan dibuat saringan COVID-19.

Kementerian Dalam Negeri dan Jabatan Penjara Malaysia sentiasa mengadakan perbincangan dengan Agensi-agensi luar yang berkaitan serta melaksanakan penambahbaikan dari masa ke semasa terutamanya dalam aspek memperkasakan dan memantapkan pengurusan dan kebajikan banduan secara khususnya.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 9 NOVEMBER 2020 (ISNIN)

SOALAN

DR. AZMAN BIN ISMAIL [KUALA KEDAH] minta **MENTERI KESIHATAN** menyatakan perbelanjaan berkaitan COVID-19 seperti berikut:

- (a) jumlah dana untuk ujian COVID-19 yang ditanggung oleh Kementerian Kesihatan; dan
- (b) jumlah elaun tambahan staf Kementerian Kesihatan yang telah dibayar berkaitan dengan pandemik COVID-19.

JAWAPAN

Tuan Yang di-Pertua,

1. Untuk makuman, Kementerian Kesihatan Malaysia (KKM) telah diluluskan peruntukan sebanyak RM1 bilion oleh Kementerian Kewangan bagi menangani wabak COVID-19. **Sehingga 10 Oktober 2020, KKM telah membelanjakan sebanyak RM1.075 bilion yang turut termasuk peruntukan sedia ada Kementerian bagi pembelian peralatan, bekalan perubatan, barangan pakai habis (*consumables*), kelengkapan perlindungan diri (PPE), reagen dan *test kit* serta lain-lain perkhidmatan dalam usaha mengawal wabak COVID-19.**
2. Daripada jumlah tersebut, **KKM telah membelanjakan sebanyak RM194 juta untuk melaksanakan ujian COVID-19 melibatkan pembelian reagen dan *test kit*, penghantaran sampel serta *outsource* perkhidmatan makmal swasta.**
3. Sebagai menghargai jasa dan pengorbanan petugas barisan hadapan termasuk kakitangan perubatan yang terlibat secara langsung dalam pengurusan dan pembendungan wabak COVID-19, **elaun khas kepada frontliners sebanyak RM400 sebulan mulai bulan Mac 2020 telah ditingkatkan kepada RM600 sebulan mulai bulan April 2020. Sehingga 31 Oktober, KKM telah membelanjakan sebanyak RM246 juta bagi tujuan bayaran Elaun Khas COVID-19 ini.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 9 NOVEMBER 2020 (ISNIN)

SOALAN

DATUK ROZMAN BIN ISLI [LABUAN] minta **MENTERI WILAYAH PERSEKUTUAN** menyatakan apakah program bantuan Yayasan Wilayah Persekutuan dan agensi-agensi lain di bawah Kementerian Wilayah Persekutuan untuk rakyat Labuan terutamanya dari segi bantuan pembiayaan pendidikan, latihan industri dan pembangunan usahawan.

JAWAPAN

Tuan Yang Di Pertua,

Untuk makluman Yang Berhormat Labuan, Tuan Yang DiPertua, Kementerian Wilayah Persekutuan (KWP) menerusi Perbadanan Labuan (PL) sentiasa mengambil perhatian khusus bagi merancang dan mendapatkan peruntukan bantuan pembiayaan pendidikan, latihan industri dan pembangunan usahawan di Wilayah Persekutuan Labuan.

Untuk makluman Ahli-ahli Yang Berhormat jua, pada tahun 2019, KWP dengan kerjasama Yayasan Wilayah Persekutuan (YWP) telah melaksanakan Program Baucer Riang Ria Kembali ke Sekolah. Program ini adalah dengan kerjasama Perbadanan Labuan dan Jabatan Pendidikan Negeri Wilayah Persekutuan Labuan.

Program ini bertujuan meringankan beban perbelanjaan murid-murid sekolah rendah daripada keluarga B40 di Wilayah Persekutuan untuk pembukaan sesi persekolahan di awal tahun. YWP telah mengagihkan baucer menerusi Jabatan Pendidikan Wilayah Persekutuan Labuan melibatkan 1,316 orang murid di 17 sekolah rendah seluruh Wilayah Persekutuan Labuan.

Manakala, untuk Parlimen Wilayah Persekutuan Labuan, YWP telah memperuntukkan sebanyak 150 baucer yang diselaraskan oleh Pejabat Parlimen Wilayah Persekutuan Labuan. Pemilihan penerima adalah menerusi ketua kampung masing-masing.

YWP juga telah memperuntukkan sebanyak 50 baucer bagi anak kakitangan Perbadanan Labuan yang berpendapatan rendah. Keseluruhan baucer yang diperuntukan kepada Wilayah Persekutuan Labuan adalah sebanyak 1,516 baucer di WP Labuan.

Bantuan adalah berupa baucer bernilai RM120.00 kepada setiap murid dan baucer tersebut hanya boleh ditebus di pusat penebusan YWP dan barangan yang boleh ditebus adalah seperti berikut:

- 1) Tiga (3) pasang uniform sekolah rendah;
- 2) Dua (2) pasang stoking; dan
- 3) Satu (1) helai baju t-sukan berwarna putih.

Selain itu, Kementerian juga menerusi PL telah bekerjasama dengan Institut Latihan Perindustrian (ILP) Wilayah Persekutuan Labuan bagi menyediakan bantuan pembayaran yuran Kursus *Oil Gas Safety Passport* (OGSP) Level 1 kepada 46 orang pelajar Teknologi Kimpalan dan Teknologi Minyak dan Gas (Mekanikal Hiliran) yang tamat latihan pada sesi 2/2020 dengan jumlah peruntukan sebanyak RM11,500.00.

Kad OGSP adalah kad wajib atau asas untuk seseorang individu untuk memasuki loji minyak di Malaysia terutamanya untuk loji Petronas. Kursus ini diadakan bertujuan untuk memberi pendedahan kepada para pelajar berkaitan dengan aspek keselamatan dalam industri minyak dan gas sebelum para pelajar menjalani latihan industri atau menceburi bidang kerjaya dalam sektor tersebut.

Pada tahun 2020 ekoran daripada pandemik Covid-19, bantuan dalam bentuk Inisiatif Ekonomi Digital bagi membantu sektor pertanian dan perikanan diperkenalkan.

Program pertama, adalah bantuan bagi meningkatkan dan mempromosikan usahawan IKS (Pembungkusan) dengan kerjasama SIRIM Malaysia dengan jumlah peruntukan RM90,000.00 kepada 10 orang pengusaha di Wilayah Persekutuan Labuan. Pengusaha terpilih yang terlibat terdiri produk juara dari Jabatan Perikanan WP Labuan, Jabatan Pertanian WP Labuan, Lembaga Kemajuan Ikan Malaysia (LKIM) WP Labuan, Lembaga Pemasaran Pertanian Persekutuan (FAMA) Labuan, Lembaga Pertubuhan Peladang (LPP) WP Labuan, Jabatan Veterinar WP Labuan dan Jabatan Kemajuan Masyarakat (KEMAS) WP Labuan.

Program kedua, adalah *Online Business* dan Pembangunan Web kepada remaja/ belia/ usahawan dengan kerjasama Perbadanan Ekonomi Digital Malaysia (MDEC) dan Universiti Malaysia Sabah Kampus Antarabangsa Labuan (UMSKAL) dengan jumlah peruntukan RM30,000.00 dengan sasaran 200 orang peserta dan telah bermula pada 15 Ogos 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HASSAN BIN ABDUL KARIM
[PASIR GUDANG]**

TARIKH : 9 NOVEMBER 2020 (ISNIN)

SOALAN

YB TUAN HASSAN BIN ABDUL KARIM [PASIR GUDANG] minta **MENTERI SUMBER MANUSIA** menyatakan apakah usaha-usaha yang telah diambil oleh Kerajaan untuk mencipta peluang-peluang kerja baru untuk rakyat yang sedang mencari kerja akibat Pandemik Covid-19 sekarang ini.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, dalam mewujudkan lebih banyak peluang pekerjaan kepada rakyat Malaysia yang kehilangan pekerjaan akibat COVID-19, beberapa inisiatif sedang dan akan dilaksanakan oleh Kerajaan. Antaranya adalah:

- i. meningkatkan pelaburan nilai tinggi melalui *Foreign Direct Investment* (FDI) dan *Domestic Direct Investment* (DDI) bagi meningkatkan penghasilan pekerjaan yang bersifat *high value jobs* dan *knowledge worker (k-worker)* agar kadar upah yang lebih tinggi dapat dinikmati oleh golongan ini;

- ii. melaksanakan latihan-latihan kemahiran yang bersifat *internship* seperti Sistem Latihan Dual Nasional (SLDN) untuk meningkatkan jumlah peluang pekerjaan berkemahiran tinggi;
- iii. melaksanakan **Program Insentif Pengambilan Pekerja (*Hiring Incentives Programme*)**, Bantuan Mobiliti dan Program Latihan di bawah Pelan Jana Semula Ekonomi Negara (**PENJANA**). Inisiatif ini adalah bertujuan untuk merangsang pengambilan pekerja oleh majikan. Pencapaian program-program **di bawah PENJANA** bermula dari **5 Jun sehingga 22 Oktober 2020** adalah seperti berikut:
 - (a) Program ***MyApprentice*** - keutamaan diberi kepada graduan baharu atau *fresh graduate* atau pelajar lepasan sekolah. Insentif kewangan sebanyak **RM600** bagi pengambilan perantis dari kalangan graduan baharu (*fresh graduate*) atau lepasan sekolah dan **RM1000** untuk pengambilan perantis Orang Kurang Upaya dari kalangan *fresh graduate*. Seramai **4,433** perantis telah berjaya ditempatkan di bawah program ***MyApprentice***;
 - (b) Program ***HireMalaysia*** - pengambilan pekerja tempatan yang juga termasuk graduan. Seramai **51,020** pekerja telah berjaya ditempatkan;
 - (c) **Bantuan Mobiliti** secara ***one-off*** kepada pekerja yang berpindah dari lokasi tempat bermastautin ke tempat kerja baharu. Seramai **3,477** orang pekerja telah mendapat faedah melalui Bantuan Mobiliti ini.
 - (d) Program **latihan** untuk graduan dan pekerja berdasarkan keperluan majikan. Seramai **7,759** graduan dan pekerja telah mendapat manfaat dari program latihan;

SOALAN NO : 43

- iv. Kerajaan telah melaksanakan Portal Perkhidmatan Pekerjaan Nasional yang dikenali sebagai *MYFutureJobs*. Portal pekerjaan ini bertujuan membantu graduan mendapatkan pekerjaan. Sejak *MYFutureJobs* diperkenalkan, seramai 44,940 belia yang dalam lingkungan umur 20-29 tahun telah berjaya ditempatkan yang mana sebahagian besarnya dalam kalangan graduan;
 - v. PERKESO telah melaksanakan program Karnival PenjanaKerjaya. Setakat 16 Oktober 2020, sebanyak 205 program Karnival Pekerjaan telah dilaksanakan yang melibatkan penyertaan 504 majikan. Program ini telah berjaya menempatkan 3,174 orang graduan dan pencari kerja yang lain;
 - vi. **TalentCorp** terus menggiatkan usaha bagi menambah baik **ekosistem tenaga bakat muda negara dan pembangunan kebolehpasaran graduan**. Program-program yang telah dilaksanakan adalah seperti ***Young Employable Students (YES!)***, ***Program Latihan Industri Berstruktur (SIP)***, ***Nurturing EXpert Talent (NEXT)***, ***Kolaborasi Industri-Akademia (IAC)*** dan ***Scholarship Talent Attraction & Retention (STAR)***; dan
 - vii. mengadakan sesi libat urus bersama pihak industri bagi membincangkan isu peluang pekerjaan sekaligus mengambil langkah-langkah bersesuaian bagi mengurangkan kebergantungan terhadap pekerja asing.
2. Bagi menyokong usaha-usaha tersebut, Kerajaan perlu menyediakan pekerja-pekerja berkemahiran yang memenuhi keperluan industri. Sehubungan itu, beberapa langkah sedang diambil oleh Kementerian Sumber Manusia, iaitu ;
- i. Program *upskilling* dan *reskilling* disediakan kepada golongan pekerja bagi mempertingkatkan kemahiran mereka untuk menyesuaikan diri dengan perubahan keperluan kerja masa hadapan serta persekitaran global yang semakin kompetitif dan

dinamik. Program *upskilling* dan *reskilling* dijalankan secara berterusan supaya kemahiran yang diperolehi sentiasa bersesuaian dengan keperluan industri semasa;

- ii. Kementerian Sumber Manusia (KSM) melalui Jabatan Pembangunan Kemahiran (JPK) telah membangunkan *National Occupational Skills Standard* (NOSS) bagi 21 sektor ekonomi. NOSS telah menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan, dan dipantau secara bersama dengan *Industry Lead Body* (ILB) mengikut keperluan industri dan teknologi terkini;
- iii. memperluas akses kepada warganegara untuk mendapat Latihan dan Pendidikan Teknikal dan Vokasional (TVET). Sehingga kini, terdapat 562 buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri; dan
- iv. KSM dan Kementerian Pengajian Tinggi (KPT) telah diberikan peranan sebagai Pengerusi Bersama bagi menerajui Jawatankuasa Kerja Pembangunan Kemahiran dan Bakat (TWG-S) Industry4WRD. Jawatankuasa ini berperanan mengenal pasti keperluan pasaran buruh dan kemahiran yang diperlukan serta menyelaraskan dan melaksanakan usaha-usaha dalam memperkukuh kompetensi sumber manusia bagi menghadapi Industri 4.0. Usaha ini dapat dilakukan melalui program *upskilling and reskilling* yang disediakan kepada golongan pelajar kemahiran dan pekerja. Program ini akan mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 9 NOVEMBER 2020 (ISNIN)

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI SUMBER MANUSIA** menyatakan apakah langkah strategik dalam menangani masalah pengangguran khususnya kepada golongan belia semasa Perintah Kawalan Pergerakan Pemulihan (PKPP) dan pasca PKPP tamat pada penghujung bulan Disember 2020 nanti.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, Jabatan Perangkaan Malaysia (DOSM) menganggarkan julat maksimum kadar pengangguran secara keseluruhannya adalah dalam lingkungan 3.5 peratus hingga 5.5 peratus pada tahun ini susulan daripada pandemik Covid-19.

2. Berdasarkan data terkini Laporan Tenaga Buruh oleh DOSM, kadar pengangguran belia pada suku tahun pertama 2020 ialah 11.0 % iaitu seramai 291.4 ribu belia. Manakala kadar pengangguran belia bagi suku tahun kedua pula ialah 12.5 % iaitu 326.7 ribu belia mengangur. Situasi ini berlaku susulan daripada pandemik Covid-19 yang menunjukkan kadar pengangguran belia meningkat sebanyak 1.5 mata peratus antara suku tahun pertama dan kedua tahun 2020.

Untuk makluman Ahli Yang Berhormat,

3. Dalam mendepani situasi pengangguran di Malaysia serta memperkasakan rakyat, Kerajaan telah mengumumkan Pelan Jana Semula Ekonomi Negara (PENJANA) bertujuan membantu mereka yang kehilangan sumber pendapatan untuk mendapatkan pekerjaan, melindungi pekerjaan dan meningkatkan kemahiran. Rakyat akan dapat memanfaatkan peluang semasa ekonomi beransur pulih melalui Inisiatif PENJANA tersebut.

4. Lima (5) inisiatif PENJANA di bawah Kementerian Sumber Manusia adalah Pelaksanaan Program Subsidi Upah, Menaik Taraf Portal Perkhidmatan Pekerjaan Negara, Program Insentif Pengambilan Pekerja dan Bantuan Latihan, Program Kemahiran dan Peningkatan Kemahiran dan Perlindungan Sosial dan Latihan bagi Pekerja Ekonomi Gig.

5. Program Subsidi Upah (PSU 1.0) dan pelanjutan Program Subsidi Upah (PSU) 2.0 telah membantu majikan yang terkesan supaya dapat meneruskan operasi syarikat serta mengelakkan pekerja hilang pekerjaan. Program ini telah melibatkan pengagihan dana Kerajaan berjumlah RM2.4 billion dengan sasaran seramai 1.3 juta pekerja. Melalui PSU 1.0, sejumlah 331,950 syarikat dan 2.72 juta pekerja telah menerima manfaat ini. Sehingga 30 Oktober 2020, PERKESO telah menerima sejumlah 54,865 permohonan daripada majikan bagi program PSU 2.0.

6. Kerajaan telah memperuntukkan sejumlah RM1.5 billion kepada PERKESO untuk Program Insentif Pengambilan Pekerja dan Bantuan Latihan. Program ini merangkumi insentif pengambilan pekerja, peningkatan kemahiran pekerja dan penganggur, bantuan perpindahan, dan kerjasama dengan agensi pekerjaan swasta sehingga tempoh 6 bulan. Program ini telah berjaya membantu sejumlah 70,113 pekerja sehingga 30 Oktober 2020.

7. Kementerian juga melalui Pembangunan Sumber Manusia Berhad (PSMB), telah melancarkan Inisiatif PENJANA HRDF pada 22 Jun 2020. Lima (5) skim telah diperkenalkan yang memberi penekanan terhadap latihan dan peningkatan kemahiran pekerja (upskilling dan reskilling) iaitu Place and Train, B40 Development, SME Development, Industry Revolution 4.0 dan Gerak Insan Gemilang (GIG).

Tuan Yang di-Pertua,

8. Dalam usaha kerajaan untuk memperkasakan rakyat, Kementerian melalui Pembangunan Sumber Manusia Berhad (PSMB) telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak Dua (2) Billion. Program kemahiran dan peningkatan kemahiran ini sedang dilaksanakan merentasi Lapan (8) Kementerian dan Agensi dan akan memanfaatkan sejumlah Dua Ratus Ribu (200 ribu) belia dan golongan penganggur.

9. PENJANA *Upskilling & Reskilling* akan membantu belia dan golongan penganggur dalam mendapatkan pekerjaan baharu (*new jobs*), menghasilkan usahawan baharu (*new entrepreneurs*) atau pengekalan pekerjaan (*job retention*). Sehingga kini, sejumlah Lima Ratus (500) juta peruntukan yang telah disalurkan dan Seratus Dua (102) ribu pelatih yang telah diluluskan untuk mengikuti pelbagai program dibawah PENJANA *Upskilling & Reskilling* ini. Langkah ini dijangka akan terus membantu mengurangkan kadar pengangguran Negara ke aras yang lebih stabil.

Tuan Yang di-Pertua,

10. Kementerian juga telah mengambil langkah pro aktif bersama-sama Kementerian Kewangan untuk memantau dan menyelaraskan pelaksanaan inisiatif-inisiatif berkaitan sumber manusia tersebut dengan menubuhkan Jawatankuasa Pekerjaan Nasional (JKPN) pada Jun 2020. Objektif Jawatankuasa ini adalah untuk memantau keadaan pasaran buruh dan pengangguran negara, menyelaraskan pelaksanaan inisiatif PENJANA serta dan memantau keberkesanan inisiatif-inisiatif tersebut.

11. Kerajaan akan sentiasa berusaha agar kadar pengangguran di Malaysia adalah terkkawal dan memastikan rakyat mampu mendepani saat-saat sukar yang belum pernah dialami oleh Negara sebelum ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 9 NOVEMBER 2020 (ISNIN)

SOALAN

TUAN CHOW KON YEOW [TANJONG] minta **MENTERI ALAM SEKITAR DAN AIR** menyatakan perkembangan kelulusan Mekanisme Penetapan Tarif (TSM). Bilakah ia akan dibentangkan dan tempoh masa Kerajaan Pusat akan menyelaraskan tarif air melibatkan semua negeri dalam memastikan pentadbiran pembekalan air yang mampan oleh operator-operator air dalam negara.

JAWAPAN

Tuan Yang Di-Pertua,

1. Kementerian Alam Sekitar dan Air telah dibentangkan cadangan pelaksanaan Mekanisme Penetapan Tarif (*Tariff Setting Mechanism* – TSM) untuk pertimbangan kepada Jemaah Menteri 17 Julai 2020. Melalui pembentangan tersebut, Kerajaan mengambil perhatian mengenai kepentingan TSM sebagai mekanisme untuk mewujudkan industri perkhidmatan bekalan air yang mempunyai kemapanan jangka masa panjang.
2. Namun demikian, atas dasar untuk mengurangkan impak langsung kepada kos sara hidup rakyat dalam tempoh pemulihan ekonomi kesan penularan pandemik COVID-19, cadangan TSM telah ditangguhkan pelaksanaannya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 9 NOVEMBER 2020 (ISNIN)

SOALAN

PUAN RUBIAH BINTI HAJI WANG [KOTA SAMARAHAN] minta **MENTERI KESIHATAN** menyatakan menerangkan komitmen dan perancangan Kementerian meningkatkan kemudahan infrastruktur Klinik Kesihatan Kota Samarahan dengan mendirikan bangunan tambahan, tambahan tempat letak kenderaan dan kemudahan perubatan.

JAWAPAN

Tuan Yang di-Pertua,

1. Bagi perancangan jangka panjang, **KKM berhasrat untuk membina Klinik Kesihatan yang baru bagi menggantikan KK Samarindah sedia ada yang terletak 12km daripada KK Kota Samarahan.** KK Samarindah yang baru ini dijangka akan dapat mengurangkan kesesakan di KK Kota Samarahan. Buat masa ini, KKM sedang mengenal pasti tapak yang sesuai untuk KK Samarindah (gantikan) ini. KKM akan sentiasa memantau keperluan kesihatan penduduk dan melaksanakan langkah-langkah penambahbaikan, tertakluk kepada kemampuan kewangan kerajaan.
2. Dalam usaha untuk meningkatkan mutu perkhidmatan kesihatan di semua fasiliti kesihatan, **KKM melaksanakan beberapa inisiatif bagi menampung kedatangan pesakit yang semakin meningkat.** Antara inisiatif yang dijalankan adalah seperti berikut:

- a) Perkhidmatan konsultasi secara maya (Virtual Clinic);
- b) LEAN Healthcare di Klinik Kesihatan
- c) Pengisian jawatan pegawai perubatan mengikut keperluan
- d) Fast lane - warga mas, OKU, kanak-kanak dan kes kecemasan. Menambahbaik sistem pendispensan ubat – Perkhidmatan tambah nilai (Value Added Services - VAS) di kaunter farmasi. (VAS – seperti Kad temujanji, Letak dan Ambil, Ubat Melalui Pos (UMP) dan juga Pusat Pengambilan Ubat Susulan Setempat (PPUSS) dan perkhidmatan ubat secara pandu lalu).

3. Bagi mengurangkan masalah tempat letak kereta pula, sistem temujanji secara berperingkat diatur supaya pesakit tidak terumpu di klinik kesihatan pada satu-satu masa sahaja. Langkah ini juga bagi memastikan pematuhan SOP pasca Perintah Kawalan Pergerakan (PKP). Kementerian juga mempunyai perancangan untuk meluaskan tempat letak kereta dengan menggunakan baki tanah dalam kawasan klinik sedia ada dan perkara ini dalam tindakan penyelarasan oleh JKN Sarawak.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DR. KELVIN YII LEE WUEN [BANDAR KUCHING]

TARIKH : 9 NOVEMBER 2020 (ISNIN)

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan pelan Kementerian untuk memenuhi keperluan psychosocial dan “mental health” mereka yang terkesan daripada PKP/PKPB termasuk pelan Kerajaan untuk menambah peruntukan untuk menangani “silent mental health pandemic” akibat pandemik ini. Adakah program khusus akan diperkenalkan kepada mereka yang memerlukannya termasuk untuk barisan hadapan kita.

JAWAPAN

Tuan Yang di-Pertua,

1. Kementerian Kesihatan telah mengambil langkah proaktif bagi menangani masalah kesihatan mental akibat daripada situasi pandemik ini. Perancangan yang telah diambil adalah seperti berikut:

- i. KKM telah menyediakan talian sokongan psikososial dan perkhidmatan konsultasi secara virtual serta menggunakan aplikasi digital dan media sosial sedia ada untuk mempromosikan kesihatan mental, kemahiran daya tindak (*coping skills*), daya ketahanan dan pencegahan kecederaan (termasuk pencegahan tingkahlaku bunuh diri) dan penyalahgunaan substans kepada kumpulan sasar;

- ii. Meningkatkan kebolehcapaian Perkhidmatan Kesihatan Mental, Pencegahan Keganasan dan Penyalahgunaan Substans dan Alkohol melalui sistem digital dan teknologi terkini secara kolaborasi pintar bersama agensi kerajaan lain dan NGO seperti *virtual consultation* dan *tele-consultation*;
 - iii. Meningkatkan kapasiti sumber manusia dari segi liputan kaunselor di peringkat komuniti;
 - iv. Menyediakan latihan kepada pemberi khidmat kesihatan, kaunselor agensi, *NGO dan juga caregiver*;
 - v. Agenda kesihatan mental di dalam Jawatankuasa Kabinet bagi Persekitaran Hidup Sihat (JKPHS); dan
 - vi. Memperkukuhkan sistem surveilan kesihatan mental iaitu membangunkan sistem registri bagi kes bunuh diri dan kecederaan fatal dan sistem registri penyakit mental peringkat kebangsaan.
2. Kementerian Kesihatan juga telah memohon peruntukan sebanyak RM26.4 juta kepada Kementerian Kewangan bagi pelaksanaan pelan tindakan kesihatan mental pada tahun 2021.
3. Kementerian Kesihatan telah mewujudkan program khusus iaitu Perkhidmatan Kesihatan Mental dan Sokongan Psikososial atau MHPSS (*Mental Health Psychosocial Support Services*) bagi memberi perkhidmatan sokongan emosi kepada masyarakat yang terkesan dengan situasi krisis, bencana dan juga wabak. Perkhidmatan ini dilaksanakan oleh pelbagai kategori anggota kesihatan yang terdiri pakar perubatan, pegawai perubatan, pegawai psikologi dan paramedik yang membentuk pasukan MHPSS di peringkat hospital, daerah, negeri dan juga kebangsaan.
4. Pasukan ini telah diaktifkan serta merta semenjak berlakunya pandemik COVID-19. Perkhidmatan ini merangkumi bukan sahaja kepada masyarakat malah juga kepada semua anggota kesihatan termasuk petugas barisan hadapan yang lain. Modus operandi bagi perkhidmatan ini adalah

melalui talian '*helpline*' bagi membolehkan masyarakat mendapatkan telekaunseling, komunikasi maya secara aktif kepada pesakit COVID-19, pesakit bawah siasatan (PUI) dan juga pesakit dalam pemantauan (PUS) serta bantuan awal psikososial kepada mereka yang terkesan akibat pandemik ini.

5. Khusus bagi petugas barisan hadapan, sesi taklimat *pre and post depolyment* diberikan kepada setiap pasukan yang menjalankan misi bantuan. Mereka juga boleh mendapatkan bantuan sokongan psikososial melalui talian MHPSS sepanjang perkhidmatan mereka. Saringan sendiri kesihatan mental dilaksanakan bagi mengenalpasti tanda-tanda awal risiko tekanan emosi. Bagi mereka yang dikesan mengalami masalah kesihatan mental akan dirujuk kepada Pakar atau pegawai psikologi bagi rawatan dan intervensi. Selain itu, bahan-bahan psikopendidikan disediakan dan boleh dicapai secara dalam talian menggunakan QR code dan aplikasi media sosial seperti *Whatsapp* dan *Telegram*.

6. Bagi pelaksanaan perkhidmatan ini, KKM telah bekerjasama dengan pihak Kementerian dan agensi kerajaan yang lain seperti Kementerian Pembangunan Wanita, Keluarga dan Masyarakat (KPWKM), Jabatan Kemajuan Islam (JAKIM) serta NGO seperti MERCY, *Women's Aid Organization* dan Mental Illness Awareness and Support Association (MIASA) dalam menangani isu-isu gangguan emosi dan psikososial, gangguan seksual, masalah hubungan, penderaan dan keganasan rumah tangga. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 9 NOVEMBER 2020 (ISNIN)

SOALAN NO. 48

PUAN NURUL IZZAH BINTI ANWAR [PERMATANG PAUH] minta **MENTERI KESIHATAN** menyatakan :-

- (a) perincian kriteria pemilihan doktor kontrak (gred UD41) yang dinaik taraf kepada status doktor tetap (gred UD44); dan
- (b) laluan ataupun langkah seterusnya yang digariskan bagi doktor kontrak yang bertungkus-lumus melawan wabak COVID-19 setelah berakhir sambungan kontrak mereka.

JAWAPAN

Tuan Yang di-Pertua,

1. Kaedah penilaian Pegawai Perubatan Gred UD41 untuk mengisi jawatan tetap memperuntukkan bahawa pegawai mestilah **memenuhi kriteria teknikal dan umum** serta tertakluk kepada kekosongan perjawatan tetap di Kementerian Kesihatan.

2. Bagi kriteria teknikal, Pegawai Perubatan Gred UD41 **mestilah lulus enam (6) posting tanpa pelanjutan dan mendapat Perakuan Pendaftaran Penuh**. Kemudian, **senarai pegawai disusun mengikut jumlah merit yang dikumpul sepanjang latihan** iaitu berdasarkan markah penilaian setiap *posting* (*Certificate Completion of Posting*) dan Laporan Nilai Prestasi Tahunan (LNPT).

3. Selain memenuhi kriteria teknikal, pegawai juga perlu memenuhi kriteria umum dan syarat lantikan skim perkhidmatan seperti diperakui sihat untuk dilantik, tidak pernah ditamatkan kontrak dan bebas daripada tindakan tatatertib.

4. **Semua permohonan untuk pelantikan tetap akan disaring di peringkat hospital dan kemudian dibawa ke peringkat Ibu Pejabat KKM bagi memastikan proses penilaian dan pemilihan dilaksanakan secara telus dan adil.** Cadangan pelantikan tetap seterusnya akan diangkat kepada Suruhanjaya Perkhidmatan Awam (SPA) bagi pertimbangan pelantikan tetap.

Tuan Yang di-Pertua,

5. Kerajaan telah **meluluskan pelanjutan tempoh kontrak secara one-off (dengan izin) kepada Pegawai Perubatan Gred UD41 yang telah menamatkan khidmat wajib** sebagai usaha menjaga kebajikan mereka dalam tempoh penularan wabak COVID-19 berikutan keadaan ekonomi yang kurang memberangsangkan dan bagi menyokong usaha Kementerian Kesihatan memastikan kesinambungan penyampaian perkhidmatan terutamanya bagi membendung dan menangani penularan wabak COVID-19.

6. Berbeza dengan matlamat pelantikan secara kontrak yang bertujuan untuk membolehkan pegawai menjalani latihan siswazah dan/ atau khidmat wajib, pertimbangan **pelantikan tetap dibuat secara berasingan dari semasa ke semasa tertakluk kepada faktor kekosongan jawatan tetap** mengambil kira pegawai memenuhi syarat pelantikan dan merit yang ditetapkan serta diperakukan oleh Jawatankuasa Penilaian untuk dilantik tetap.

7. Selain peluang pelantikan secara tetap yang dilaksanakan di KKM, pegawai juga berpeluang untuk memohon pekerjaan di agensi awam yang lain seperti hospital-hospital universiti awam dan juga di sektor swasta dan syarikat yang memerlukan pekerja yang mempunyai pengetahuan dan kemahiran dalam bidang kesihatan seperti makmal perubatan swasta, syarikat farmaseutikal dan lain-lain.
Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN NOR AZRINA BINTI SURIP [MERBOK]

TARIKH : 9 NOVEMBER 2020 (ISNIN)

SOALAN

Minta **MENTERI PENGANGKUTAN** menyatakan kewajaran meminda Undang-Undang Seksyen 23(2) Akta Pengangkutan Jalan 1987 iaitu kesalahan menggunakan cukai jalan perdagangan pada kenderaan lain.

JAWAPAN

Yang di-Pertua,

1. Untuk makluman Yang Berhormat, Penetapan fi Lesen Kenderaan Motor (LKM) atau cukai jalan bagi sesebuah kenderaan adalah ditentukan mengikut kriteria-kriteria berikut:

- (i) kapasiti enjin;
- (ii) kawasan isytihar/penggunaan (Semenanjung, Sabah, Sarawak, Pulau Langkawi, Pulau Labuan);
- (iii) jenis milikan (individu atau syarikat);
- (iv) tujuan kegunaan (persendirian, barangan, perkhidmatan awam); dan
- (v) bahan bakar (petrol, diesel, elektrik).

2. Seksyen 23(2) Akta Pengangkutan Jalan (APJ) 1987 telah memperuntukkan, adalah menjadi suatu kesalahan sekiranya kenderaan yang didaftar dan dilesenkan bagi tujuan kegunaan tertentu, namun kenderaan tersebut diguna pakai bagi penggunaan yang lain. Sebagai contoh, kenderaan yang didaftar dan dilesenkan atas kenderaan persendirian tidak boleh digunakan bagi tujuan mengangkut barangan (kenderaan barangan) atau perkhidmatan awam.

3. Untuk makluman Dewan Yang Mulia ini, pindaan terkini terhadap Seksyen 23(2) tersebut pernah dilaksanakan pada tahun 2011 melibatkan peningkatan denda iaitu “tidak melebihi sepuluh ribu ringgit” berbanding sebelumnya “tidak melebihi dua ribu ringgit”. Tindakan penguatkuasaan bagi kesalahan salah guna LKM ini sentiasa dilakukan oleh JPJ dan PDRM mengguna pakai punca kuasa sedia ada.

4. Sehubungan itu, Kementerian Pengangkutan Malaysia melalui Jabatan Pengangkutan Jalan Malaysia pada masa ini belum bercadang untuk meminda Seksyen 23(2) APJ 1987 tersebut. Walau bagaimanapun, pihak Kerajaan dalam perancangan untuk meminda Akta bagi memperketat lagi peraturan penyalahgunaan LKM khususnya yang melibatkan kesalahan pengisytiharan kegunaan kenderaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN DR LEE BOON CHYE (GOPENG)

TARIKH : 9 NOVEMBER 2020 (ISNIN)

SOALAN

DR LEE BOON CHYE [GOPENG] minta **MENTERI DALAM NEGERI** menyatakan kos operasi ESSCOM setiap tahun dan setakat manakah ESSCOM berjaya menyekat kemasukan PATI ke Sabah.

JAWAPAN

Tuan Yang Di Pertua,

Kerajaan telah memperuntukkan peruntukan operasi kepada ESSCOM pada tahun 2018 berjumlah RM19.29 juta, 2019 sebanyak RM25.64 Juta dan tahun 2020 sebanyak RM28.15 juta bagi kos perbelanjaan mengurus. Peruntukan ini bertujuan untuk menyelaraskan operasi dan tanggungjawab bagi menjamin keselamatan di pantai timur Sabah.

Bagi menangani masalah PATI, KDN melalui ESSCOM telah mengambil beberapa pendekatan. Diantara langkah terbaru yang telah diambil adalah melalui platform Op Benteng iaitu operasi bersepadu melibatkan agensi seperti ATM, PDRM, APMM dan JIM dalam mengekang kemasukan PATI. Melalui pelaksanaan Op Benteng beberapa tindakan telah diambil seperti berikut:

- i. Mewujudkan '*Road Check Point*' (RCP) di kawasan strategik dan laluan utama penduduk yang melibatkan anggota PDRM seperti

di RCP Sapi Nangoh dan RCP Kalabakan dalam membendung aktiviti penyeludupan PATI, barang kawalan dan sebagainya; dan

- ii. Mewujudkan Ops Cegah Pati (OCP) Timur yang melibatkan perairan Kunak dan Semporna, OCP Utara melibatkan perairan Tawau dan OCP Selatan melibatkan perairan Sandakan. Ketiga-tiga OCP ini berperanan membendung kemasukan PATI warganegara Indonesia dan Filipina dan sekaligus mengawal penularan pandemik COVID-19.

Hasil daripada operasi yang dijalankan mendapati kemasukan PATI melalui laut juga amat berkurangan. Pengurangan kes ini juga turut disebabkan dasar-dasar kerajaan negeri Sabah dalam menangani pandemik COVID-19 yang tidak membenarkan kemasukan warga asing ke Sabah serta menggantung sebarang urusanniaga yang melibatkan *Barter Trade* dan Transshipment. Tahun 2019, seramai 13,233 PATI telahpun di usir manakala sehingga bulan Oktober 2020, hanya seramai 4,097 PATI telah diusir. Penurunan jumlah pengusiran ini membuktikan keberkesanan operasi yang dijalankan oleh agensi-agensi di bawah penyelarasan ESSCOM.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK SERI SAIFUDDIN NASUTION
BIN ISMAIL [KULIM BANDAR BAHARU]**

TARIKH : 9 NOVEMBER 2020 (ISNIN)

SOALAN

YB DATUK SERI SAIFUDDIN NASUTION BIN ISMAIL [KULIM BANDAR BAHARU] minta **MENTERI SUMBER MANUSIA** menyatakan senarai rancangan Kerajaan khusus membantu rakyat hilang punca pendapatan dan hilang pekerjaan.

JAWAPAN

Tuan Yang di-Pertua,

1. Untuk makluman Ahli-Ahli Dewan yang mulia ini, Kerajaan telah memberi perhatian terhadap isu kebarangkalian kadar pengangguran akan meningkat dari awal Perintah Kawalan Pergerakan (PKP). Beberapa inisiatif untuk membantu mengurangkan beban industri dan menjamin kelangsungan pekerjaan bagi tenaga kerja telah diperkenalkan seperti Pakej Rangsangan Ekonomi dan Pelan Jana Ekonomi Negara (PENJANA).
2. Antara inisiatif yang diperkenalkan adalah inisiatif PENJANA berkaitan sumber manusia, iaitu :
 - i. **Program Subsidi Upah** merupakan bantuan kewangan yang dibayar kepada majikan setiap perusahaan bagi setiap pekerja tempatan yang bergaji RM4,000 ke bawah.

- ii. **menaik taraf Portal Perkhidmatan Pekerjaan Negara** bertujuan untuk memperkukuh portal pekerjaan dan padanan kerja serta bekerjasama dengan portal pekerjaan swasta untuk padanan kerja.
- iii. **Program Insentif Pengambilan Pekerja dan Bantuan Latihan** bagi menggalakkan pengambilan pekerja dengan menyediakan insentif kewangan kepada majikan.
- iv. **Program Kemahiran dan Peningkatan Kemahiran** bagi meningkatkan kebolehpasaran golongan penganggur melalui program latihan untuk mendapat kemahiran dan meningkatkan kemahiran.
- v. **Perlindungan Sosial dan Latihan bagi Pekerja Ekonomi Gig** untuk menjamin keselamatan sosial dan kebajikan golongan pekerja ekonomi gig.

Tuan Yang di-Pertua,

3. Untuk memastikan peluang pekerjaan terus dicipta dalam bulan-bulan yang akan datang, dan bagi mewujudkan lebih banyak peluang pekerjaan kepada rakyat Malaysia yang kehilangan pekerjaan, beberapa inisiatif sedang dan akan dilaksanakan oleh Kerajaan. Antaranya adalah:

- (i) meningkatkan pelaburan nilai tinggi melalui *Foreign Direct Investment* (FDI) dan *Domestic Direct Investment* (DDI) bagi meningkatkan penghasilan pekerjaan yang bersifat *high value jobs* dan *knowledge worker* (k-worker) agar kadar upah yang tinggi dapat dinikmati oleh golongan ini;
- (ii) melaksanakan latihan-latihan kemahiran yang bersifat *internship* seperti **Sistem Latihan Dual Nasional (SLDN)** untuk meningkatkan jumlah peluang pekerjaan berkemahiran tinggi. Konsep SLDN adalah sistem pembelajaran di mana 70% – 80% latihan praktikal dilaksanakan di tempat kerja dan 20%-30% pembelajaran teori di pusat latihan. Sistem latihan sebegini

dapat meningkatkan kebolehpasaran graduan. Secara tidak langsung SLDN menjadi salah satu usaha Kerajaan untuk menyediakan peluang pekerjaan bagi menangani masalah pengangguran;

- (iii) menyediakan insentif-insentif untuk syarikat bagi memperbanyakkan elemen-elemen berteknologi tinggi yang dijangka akan meningkatkan jumlah peluang pekerjaan berkemahiran tinggi; dan
- (iv) mengadakan sesi libat urus bersama industri bagi membincangkan isu peluang pekerjaan, sekaligus mengambil langkah-langkah untuk mengurangkan kebergantungan terhadap pekerja asing.

4. Bagi menyokong usaha-usaha di atas, Kerajaan harus menyediakan pekerja-pekerja berkemahiran yang memenuhi keperluan industri. Sehubungan dengan itu, beberapa langkah sedang diambil oleh Kementerian Sumber Manusia, iaitu :

- (i) program *upskilling* dan *reskilling* disediakan kepada golongan pekerja bagi mempertingkatkan kemahiran mereka bagi menyesuaikan diri dengan perubahan keperluan kerja masa hadapan serta persekitaran global yang semakin kompetitif dan dinamik. Program *upskilling* dan *reskilling* dilaksanakan secara berterusan supaya kemahiran yang diperolehi sentiasa bersesuaian dengan keperluan industri semasa;
- (ii) Kementerian Sumber Manusia (KSM) melalui Jabatan Pembangunan Kemahiran (JPK), telah membangunkan *National Occupational Skills Standard* (NOSS) bagi 21 sektor ekonomi. NOSS menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan, dan dipantau secara bersama dengan *Industry Lead Body* (ILB) mengikut keperluan industri dan teknologi terkini;

SOALAN NO : 51

- (iii) memperluas akses kepada warganegara untuk mendapat Latihan dan Pendidikan Teknikal dan Vokasional (TVET). Sehingga kini, terdapat 562 buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri; dan
- (iv) KSM dan Kementerian Pengajian Tinggi (KPT) telah diberikan peranan sebagai Pengerusi Bersama bagi menerajui Jawatankuasa Kerja Pembangunan Kemahiran dan Bakat (TWG-S) Industry4WRD. Jawatankuasa ini berperanan mengenal pasti keperluan pasaran buruh dan kemahiran yang diperlukan serta menyelaraskan dan melaksanakan usaha-usaha dalam memperkukuh kompetensi sumber manusia bagi menghadapi Industri 4.0. Usaha ini dapat dilakukan melalui program *upskilling* dan *reskilling* yang disediakan kepada golongan pelajar kemahiran dan pekerja bagi mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik.

Sekian, terima kasih.